

四庫全書

經部

欽定四庫全書

易翼宗卷五

湖北巡撫晏斯盛撰

下經



損 有孚元吉无咎 貞利有攸往 曷之用 貞

二簋可用享

簋蜀才
作軌誤

傳 損下益上其道上行 損而有孚元吉无咎 貞利

有攸往曷之用二簋可用享二簋應有時損剛益柔有時損益盈虛與時偕行大衆山下有澤損君子以懲忿窒欲繫辭損德之修也損先難而後易損以遠害序卦緩必有所失故受之以損雜卦損益盛衰之始也

子夏傳孔子讀書至損益喟然而嘆子夏避席而問答曰自損者益自益者缺是以嘆也又淮南子引孔子讀易至損益喟然而嘆曰或利之適足以害之或害之適足以利之利害禍福之間不可不察

三陽三陰乾坤否泰之分際與益相反覆而本卦上下又自相對待上卦陰多下卦陽多陰主文陽主質當減下卦之陽以補上卦乃不至陰多於陽文浮于質故傳曰其道上行此卦之所以名損也上下卦陽皆應陰故有孚孚則以陽益陰元陽為主矣故元吉彼此相濟陰陽不愆故无咎正道也苟可貞道在上行故利有攸往夫以陽益陰尚質之道也以質為文而彼此取稱足以徵信則質也者孚之實也不必

繁縟之多儀而神明可鑒故又申之曰此尚質之道
果何如乎如享祀之禮固將潔粢豐盛備物致敬然
與其敬不至而物有餘毋寧物不及而敬至也雖二
簋可也審其為可損之善物也故傳曰應有時

先儒皆據六三爻辭三人行則損一人謂乾九三升
于坤上為損之主非也每卦反覆相推之中又有陰
陽對待大分當從其大者觀之上經乾坤之後闕十
卦而至泰否下經咸恒之後闕十卦而至損益泰否

小乾坤也兩卦相對待而本卦亦相對待也損益類咸恒也澤山為咸而山澤則損雷風為恒而風雷則益亦兩卦相對待而本卦自相對待也蓋泰之下損一陽以益上則為損否之上損一陽以益下則為益其實山澤風雷自相對待本卦之損合兩體觀之則上卦陰多下卦陽多而陽當損以益陰從泰之損下一陽成損之象以為之綱也是故初爻曰已事遄往又曰酌損之是初固損以益四也二爻曰弗損益之

之指五而言益之則損在其中若夫三之三人行則損一人以泰之乾去其三之一也一人行以下卦止一陰孤行而上得損乾之一陽為艮之上以為益也四之損疾因初之遄往而見五之或益因上為損以益下之主而言上九弗損益之以乾一上行故不見其損而實已益若專以三為成損之主則初之酌損之謂之何且卦爻之變皆自下而上無獨從三起者來氏知兩卦之覆推然其所謂三行上而居四者幾

成以陰益陰西河知泰否之推移而亦以三為損之
實皆失之傳曰損下益上下謂乾初上謂坤六各爻
損益皆酌盈劑虛損陽益陰



初九 句 已事遄往 句 无咎 句 酌損之

已虞翻作祀遄
荀爽作顓俱誤

傳已事遄往尚合志也

已事已然之事當損者也而時值其初上應于四彼
正須陽遄往速以益之也彼須益而我益之何咎之

有因其事之相須而往則已稱量乎時之宜矣故曰酌損之紕華式靡初以為質也適往于事後則酌損已在其中故傳不重釋

䷧

九二

句

利貞

句

征凶

句

弗損

句

益之

傳九二利貞中以為志也

陰陽進退適中而已損也者損其多以益少中也得中而復損之則嗇矣是故弗損乃所以為益九二得

中正也故利貞不當復有所往往失正矣故凶夫所謂利貞者守已之道也尚質之事也人心風俗由此而淳是弗損乃所以為益也傳專言九二利貞則弗損之益已見矣



六三

句

三人行

句

則損一人

句

一人行

句

則得其友

傳一人行三則疑也繫辭天地絪縕萬物化醇男女構精萬物化生易曰三人行則損一人一人行則得其友

言致一也

三人乾本三陽也損一人減一陽以居上也一人行坤之一陰獨行于內也友上剛之應也蓋就乾三陽觀之則已損其三之一矣就坤三陰觀之則分一陰以行於下而其乾所損之一陽實為益之主而相與為應損之為益如是皆以陰陽配偶之精而言故繫辭傳復就天地男女言之致一亦即本傳所謂不疑者也



六四 句損其疾 句使遄有喜 句无咎

傳損其疾亦可喜也

天下之當損者孰如疾哉今有痿羸者于此忽得補劑以益之則霍然起矣雖疾可藥也視无妄之勿藥若異而視恒之貞疾已遠故亦可喜即咎之所以无也四柔甚而初九應故有此象

楊氏萬里曰六四以柔居四得初九之陽以為應損其疾

者也初言遄往四言使遄蓋初之遄實四有以使之也

䷗

六五

句

或益之

句

十朋之龜弗克違

句

元吉

傳六五元吉自上祐也

乾損一陽以益上此損之由名傳曰其道上行上蓋卦之主也損之所以為益也六五虛中居尊比近相承謙而能受傳曰自上祐謂上九也乾之一陽上升者正為我助其益也洊至而疊來不一而足也故曰

或益之或者衆辭也多辭也十朋之龜大龜也弗克
違言卜之而從也張子所謂龜弗違言受益之可必
信然不疑者是也人事天道交相應也得乾元之助
本然至善者也故元吉

楊氏時曰柔得尊位虛已而下人則謙受益時乃天
道天且不違況于人乎況于鬼神乎宜其益之者至
矣故曰或益之十朋之龜弗克違元吉

郭氏雍曰益之至豈獨人事而已雖元龜之靈弗能

違此其所以元吉也洪範曰汝則從龜從筮從卿士
從庶民從是之謂大同六五之元吉猶洪範之大同
也



上九

句

弗損

句

益之

句

无咎

句

貞吉

句

利有攸往

句

得

臣无家

傳弗損益之大得志也

損下益上其道大行上固損以為益者也故明揭之

曰損而弗損也直益之矣此卦之主爻故无咎貞吉
與卦辭同无咎云者損而弗損无所為咎也貞吉云
者損而為益正所以為吉也利有攸往道上行也得
臣无家益之大者貞吉之至也以陽助陰損有餘以
補不足成艮虛而有光統衆陰以效順故傳曰大得
志大謂陽

王氏肅曰處損之極損極則益故曰弗損益之得臣
則萬方一軌故无家也

益

句

利有攸往

句

利涉大川

傳益損上益下民說无疆自上下下其道大光利有攸往中正有慶利涉大川木道乃行益動而巽日進无疆天施地生其益无方凡益之道與時偕行大象風雷益君子以見善則遷有過則改繫辭包犧氏殳神農氏作斲木為耜揉木為耒耒耨之利以教天下益取諸益益德之裕也益長裕而不設益以興利序卦損而不已必

益故受之以益

三陽三陰損之覆推艮剛下為震兌柔上為巽陽與陰交陽益陰也而巽震又自相對待陽與陰配亦陽益陰也益之所以名也陽君陰民損上益下象即事也上之損而實以益下二五中正為益之主無少屯滯四海蒙休被潤澤而大豐美民之說即道之光也道之光即慶之所以集也何往不利而又言利涉大川者以卦之兩質言也巽震皆木而虛其中有舟象

焉渙與中孚之似也故其辭同震動弋入進而无疆
舟之利也卦之德也要皆陰陽施生之理時行不息
之道也



初九句利用為大作句元吉无咎

傳元吉无咎下不厚事也

作工作也大作如四所謂為依遷國建城郭宮室之
事也初自損之上而下下為益之始六四相應民心

樂赴靈臺之詩曰經始靈臺經之營之庶民攻之不日成之經始勿亟庶民子來利用之也傳曰下不厚事猶所謂不以為泰者言不惜其力自忘其勞也此本然至善之事何過之有故无咎



六二句或益之句十朋之龜弗克違句永貞吉句王用

享于帝吉

傳或益之自外來也

本文即損之五而六二中正九五正應受五之益志
同道合益之最盛者其曰或者不一而足之詞此事
之必然無疑者也又曰永貞者二得坤貞亦屬臣道
必如是而後吉以此享帝天亦降之福其益更不可
勝言也傳曰自外來謂五也

郭氏雍曰或益之人益之也十朋之龜弗克違鬼神
益之也王用享于帝吉天益之也天且弗違况于人
與鬼神乎



六三

句

益之

用凶事

句

无咎

句

有孚

句

中行告公

句

用圭

王肅本圭字

上有恒字謬

傳益用凶事固有之也

六三受益之位也故曰益之然危地也震極也故其

用為凶事如水火青蘄之類及患難非常之事六三

虛而能受上九應之不失其為益故无咎然曰凶事

則國之大事矣未信而動可乎陰陽相含有中孚之

象馬弔在前也如是可行矣中行行人之官也告
公告行於公也用圭行人之幣也皆用凶事之所有
事

朱子語類益之用凶事猶書言用降我凶德嘉績于
朕邦蔡氏清曰當益之時概當得益而居下之上乃
危地也故為益之以凶事之象雖凶事亦益之也所
謂苦其心志行拂亂其所為動心忍性曾益所不能
也



六四

句

中行告公

從句

利用為依遷國

傳告公從以益志也

中行告公因上文而言從者與初近五又有初九之應也利用為依遷國因初九之應利用為大作而言六四承五志在益下念切民依遷國大事詢謀僉同此其所以利也程傳曰自古國邑民不安其居則遷遷者順下而動也



九五

句

有孚惠心

句

勿問

句

元吉

句

有孚

句

惠我德

傳有孚惠心勿問之矣惠我德大得志也

五陽剛得中居尊益下之主六二以中正弗違者應之陰陽相得孚甚矣惠者益之實心者惠之本孚惠心惠由於其心也勿問無計功謀利之見益道之大善也惠我德由我出之人皆利之也有孚惠者其心自勿問而元吉然有孚惠如是人亦德我自然之應

也

呂氏祖謙曰人君但誠心惠民不須問民之感如此
然後元吉民皆交孚而惠君之德也苟惠民而先問
民之感不感是計功謀利非誠心惠民者也安能使
民之樂應乎



上九

句

莫益之

句

或擊之

句

立心勿恒

句

凶

傳莫益之偏辭也或擊之自外來也繫辭子曰君子安

其身而後動易其心而後語定其交而後求君子修此三者故全也危以動則民不與也懼以語則民不應也无交而求則民不與也莫之與則傷之者至矣易曰莫益之或擊之立心勿恒凶

以陽剛而居益之極極則益盡而不可復益矣不但莫益之也且或將擊之矣所以然者益之為道日進无疆與時偕行而上九器盈不可復益已失其道是其心之不恒取敗之道也故凶



夬

句

揚于王庭

句

孚號有厲

句

告自邑

句

不利即戎

句

利有攸往

傳夬決也剛決柔也健而說決而和揚于王庭柔乘五剛也孚號有厲其危乃光也告自邑不利即戎所尚乃窮也利有攸往剛長乃終也大衆澤上于天夬君子以施祿及下居德則忌繫辭上古結繩而治後世聖人易之以書契百官以治萬民以察蓋取諸夬序卦益而不

已必決故受之以夬夬者決也雜卦夬決也剛決柔也
君子道長小人道消也

五陽一陰與姤覆推當剛長之時而一柔掩于其上
勢在必決者也故名夬上切近五而乘之以柔聲其
罪而去之可也故曰揚于王庭五剛相連是衆孚而
羣號也亦共危之也而相示以為不可忽孚號之心
也故傳曰其危乃光是以先治其內而後可以攘外
邑近邑也告謀議周詳訓飭愼密也陰敢自肆而驟

以武勇勝之彼將大逞其技以為亂所傷者必多矣
故不利即戎而惟是羣陽以漸而進則衆正滿朝陰
邪自消矣卦之為德內健外說即為去惡之道也
先儒字號斷句有厲又句是孚號而有厲矣非也有
厲即孚號之心也傳所謂其危乃光也

胡氏炳文曰以五陽去一陰而象為警戒危懼之辭
不一蓋必揚于王庭使小人之罪明以至誠呼號其
衆使君子之類合不可以小人之衰而遂其肆也有

危道焉不可以君子之盛而事威武也有自治之道
焉復利往往而為臨為泰為夬也夬利往往而為乾
也蓋陰之勢雖微蔓或可滋窮而為敵君子固無時
不戒懼尤不可于小人道衰之時忘戒懼也



初九 句 壯于前趾 句 往不勝 句 為咎 趾荀氏作止

傳不勝而往咎也

當夬之初任壯而動非孚號有厲之心也前趾謂初

體剛而動故壯壯于前趾則竟往矣往必不勝不勝則小人得志而君子之勢失其過不可補矣故為咎蘇氏軾曰大壯之長則為夬故夬之初九與大壯之初九無異

朱子語類曰壯于前趾與大壯初爻同此卦大率似大壯只爭一畫



九二

句惕句號句

莫夜有戎勿恤

惕苟爽翟元俱作錫謬

傳有戎勿恤得中道也

惕內敬號外誠彖所謂孚號有厲者也九二剛而得
中央之善道故與彖辭同莫夜有戎陰警也恤憂也
勿憂素備無虞也此則彖所謂其危乃光者矣張子
曰警懼申號能孚號而有厲也以必勝之剛決至危
之柔能自危厲雖有戎何恤



九三

句

壯于頄

句

有凶

句

君子夫夫

句

獨行遇雨若濡

句

有愠句无咎

頤鄭元作頤云夾面也蜀才作瞽字聲之誤明張氏晉王本作尻後人謬改

傳君子夬夬終无咎也

九三當剛勝之時居偏危之地恐其過也而上六正應陰陽相合疑于汚也故分別言之以盡其情以善其道頤音達頤也壯于頤猶言發怒見于詞色者也衆剛同欲決陰而上六正應反若引以為援能無怒乎怒則過矣非決而和之道凶也君子處此惟有夬之又夬不為六移應與之間雖獨有因緣而當之若

况獨行遇雨而身已若濡但愠于心而不遽形于色
則乎號有厲央而和者即在是吾志已定小人終去
可補過矣故无咎王允之于董卓溫嶠之于王敦事
有類此者

辭之分別文情本自較然而先儒以為差錯胡安定
移其文曰壯于頄有凶獨行遇雨若濡有愠君子夬
夬无咎程子移其文曰壯于頄征凶獨行遇雨君子
夬夬若濡有愠无咎皆不安蓋未嘗將壯頄有愠分

別本爻應爻而深玩之也

陸氏希聲曰當君子之世而應小人故外有沾汚之累內有愠恨之心然後獲无咎者志有存焉

三〇三

九四 臀无膚

句

其行次且

句

牽羊

句

悔亡

句

聞言不

信

次說文及鄭本俱作越一作趺且馬云助語一作越李鼎祚作越趙牽子夏傳作擊

傳其行次且位不當也聞言不信聰不明也

兑上體之下而居後故為臀變坎則陷故无膚次且

與趙趙同九四當羣剛決柔之際而剛在兌悅之初
懷疑不進悔之道也兌為羊牽制也牽制于兌不變
為坎可以亡悔不失為夬而兌變坎為耳為聞言其位
不中不正則內無所主故為不信乾為言告自邑者
也九四雖近而聞之而柔靡居心面從而實背之此
行所以次且也利有攸往而不能往也此君子中之
小人視九三之夬夬者遠矣當夬之時其何恃哉

方氏疑本義讓羊使前而隨其後則羊乃衆君子之

象而以謂就兌羊之象言之則羊還是九四是矣至
謂羊性善觸不至羸角不已聖人教以自牽其羊抑
其狠性可以亡悔亦壯頰有凶之意則與傳所謂位
不當者不合聞言不信雖分釋而位不當則本爻之
大旨也



九五

句

覓陸夬夬


句

中行无咎

陸蜀才
作陸誤

傳中行无咎中未光也

莧陸二草名朱子語類曰莧陸是兩物莧者馬齒莧
陸者草陸一名商陸者是也二草繁生以喻小人之
滋蔓九五切近上六為夬之主故夬之又夬然懼其
過也而九五中正故因其迫而怒之深勿以其細而
發之易斯揚于王庭乎號有厲之心行之得中故无
咎彖傳曰其危乃光也本爻傳曰中未光謂中之夬
夬有輕視上六之志必不過激而後可以无咎也三
應六故重夬夬五近六故重中行觀傳發明可見



上六 句 无號 句 終有凶

傳无號之凶終不可長也

夫已盡矣陰至消極可無所用其孚號矣然陰之端倪結于兌體因其柔說而忽之將有破裂而不可收者故凶傳曰終不可長文義甚明猶然其危乃光之意也兌說六柔無號矣凶之道也本義謂小人居窮極之時黨類已盡無所呼號終必有凶程傳謂无

號咷畏懼終必有凶蔣氏惺生謂傳義似為小人謀
俱未解傳意



姤

句

女壯

句

勿用取女

姤鄭本作遘馮椅云王洙改今
文為姤毛西河云雜卦傳石經

亦作遘張氏明晉王本作媾義同取陸
德明作娶又郭京本無女字俱妄改

傳姤遇也柔遇剛也勿用取女不可與長也天地相遇
品物咸章也剛遇中正天下大行也姤之時義大矣哉
大象天下有風姤后以施命誥四方序卦決必有所遇

故受之以姤姤者遇也雜卦姤遇也柔遇剛也

一陰五陽夫之覆推不期而會曰遇姤之為遇羣剛之下柔忽然來也柔之初進其幾甚微然浸長之勢從此而始是陰為主以此取女未必能貞為其近羣陽而弔以入之也弔長女亦壯之象幽王之得褒姒高宗之立昭儀明皇之立貴妃歷代女禍皆不謹始之貽不爽之應

馮氏椅曰古文姤作遘遇也亦婚媾也以女遇男為

象王洙易改為今文為姤雜卦猶是古文鄭本同按
今文先於古文改遘誤也姤雖今文實則初本



初六

句

繫于金柅

句

貞吉

句

有攸往見凶

句

羸豕孚蹢


躅

柅子夏傳作鋼蒼頡篇作欄王肅本作柅蜀才本作尼俱誤

傳繫于金柅柔道牽也

金柅本義謂所以止車以金為之來氏謂柅者收絲
之具金者簠上之孔毛西河謂金柅弱木實如繫而

黃未見定義然朱子本程傳程傳本漢儒舊解義較
長仍從之柅以止車而繫之則不行可知初六一陰
而遇羣陽在方進之時猶可及止也止則不自失其
身貞道也故吉不然貪于所遇而有所往則喪其所
守女禍滋張必見凶矣如羸豕之初孚而蹢躅跳擾
也夫狐媚惑人入宮見疾可醜之態其端已露可不
謹哉



九二句 包有魚

句

无咎

句

不利賓

包莠爽本作肥明
晉王本作庖俱非

傳包有魚義不及賓也

初姤之主質陰下翔魚象也九二切近相比所居得
中足以制初故曰包有魚包而有之其義專一不可
有二是故初與四應則四固賓也而二以比近相遇
物有所主故无與于賓若四起而爭之則犯義矣其
何利哉

李氏開曰剝之貫魚姤之包有魚皆能制陰者也

胡氏炳文曰包如包苴之包容之于內而制之使不
得逸于外也



九三

句臀无膚

句其行次且

句厲

句无大咎

傳其行次且行未牽也

三在下體之上亦臀也姤三即夬四故辭略同而彼
以位言此以勢言貪初柔之遇而二間之次且欲進
至於危厲剛動之故也然剛居下體不牽連于四不

應于初終不犯體仍無大咎則又其位之善于夬四者矣



九四 句 包无魚 句 起凶

傳无魚之凶遠民也

四與初為正應當遇者也而已遇于二矣是初陰本已所當有之物而不為已有則其居于四也僅擁虛位而于正應也亦抱虛名論陰陽之義則如夫之不

能有其婦論上下尊卑之分則如君之不能有其民
其事已出常情之外其變必在蕭牆之內凶雖未見
然由此而起矣陰陽之禍非一朝一夕之故也或曰
魚之无非四之罪然四之所以遇此者槩可知也且
四終不能忘情于初也欲无凶得乎

䷗

九五

句

以杞包瓜

句

含章

句

有隕自天

以予夏傳作作郭京作似包子

夏傳作
鮑俱謬

傳九五含章中正也有隕自天志不舍命也

陽剛居尊得中而正制姤之主又于初陰不比不應其下視之如杞之高而下以包瓜絕不相與者然而變而為離有文明之象故曰含章以至尊之位中正之德不邇不殖天德內蘊則制陰之任在已所謂勿用取女者天運可自我回也至姤轉為復雖曰天命豈非人事哉傳曰志不舍命亦于其中正而知之也



上九句 姤其角 句 吝 句 无咎

傳姤其角上窮吝也

姤者一陰之生也九二而外諸陽之所忌無取乎遇也九三為二所間不相遇也故厲而无咎上九則其去初陰為益遠矣尚何吝哉但感遇者又忌其窮九以剛居上堅不可移物之角象之是終不求遇者亦終無所遇矣人至于無所遇遺世違衆行何之乎吝矣

徐氏幾曰上九處始之窮與初無遇雖吝亦无咎陰不必遇也



萃句亨王假有廟句利見大人亨句利貞用大

牲吉句利有攸往項氏安世曰卦名下元無亨字獨王肅有王弼遂用其說孔子彖辭初不

及此字按馬鄭註虞本俱無此字

傳萃聚也順以說剛中而應故聚也王假有廟致孝享也利見大人亨聚以正也用大牲吉利有攸往順天命

也觀其所聚而天地萬物之情可見矣大衆澤上于地萃君子以除戎器戒不虞序卦物相遇而後聚故受之以萃萃者聚也雜卦萃聚而升不來也

二陽四陰與升履推與比相似六十四卦中二陽相連者五小過在互中名義故別至二陽在初二曰臨二陽在二三曰升名相近似至二陽在四五曰萃二陽在五上曰觀名既相近而觀之彖曰盟而不薦萃之彖曰王假有廟皆以祭祀義蓋艮為宗廟允為巫

坤為衆為土而陽泣于五上故曰觀上有一陰以二陽在坤上而中含故曰萃凡觀之盛莫盛於灌將之際萃之虔莫虔於假廟之日以萃言之坤順兌說五剛得中有應于下萃之實也王者合萬國以享先至順且說精之所萃昭格誠至坤戶允巫有廟象焉故曰王假有廟九五位尊大人也九四相比羣陰相協而應故利見孝治天下君臣皆會典也禮也故亨且貞大祭必用牢故用大牲又坤為牛亦牲象坤順應

五故利有攸往物之所聚即情之所向天地萬物無有二致

趙氏汝騰曰陽居五而五陰從之為比陽居五與四而四陰從之為萃二卦相似然比者衆陰始附之初聖人作而萬物睹之時也萃者二陽相比羣萃而歸之君臣同德萬物盛多之時也

何氏楷曰用大牲吉承王假有廟言利有攸往承利見大人言



初六

句

有孚不終

句

乃亂乃萃

句

若號

句

一握為笑

句

勿恤

句

往无咎

握傳氏作渥
鄭氏亦讀屋

傳乃亂乃萃其志亂也

初也而慮其不終以四五皆陰之萃也視比之一陽
當五終來有他吉者異矣將萃四乎而五為萃主將
萃五乎而四為正應雖孚于四而其志亂矣則甚矣
專一之為貴也若專號乎五則一握手而為笑矣勿

徒憂恤惟往萃五斯无咎耳如是者所以定志也言此以足亂萃之意玩傳可見

錢氏曰萃與比同所異者多九四一陽耳比初無應曰有孚者一于五也萃初與四應曰有孚不終者有二陽焉不終于四也及此時而號以求萃可以破涕為笑同人先號咷而後笑者是也



六二 引吉无咎 句 孚乃利用禴

禴蜀才作躍劉
獸作禴俱謬

傳引吉无咎中未變也

六二中正應五當翕萃之時有汲引之吉故无過咎其所為萃者二五相孚皆以樸誠無事繁文故利用禴禴祭之薄者是象所謂利見大人亨利貞也

王氏家傳曰彖以用大牲為吉而六二以用禴為利何也備物者王者所以隨其時有孚者人臣所以通乎上



六三 句 萃如嗟如 句 无攸利 句 往无咎小吝

傳往无咎上巽也

六三陰柔不中與二陽相承固萃如矣而上與五隔夫萃之主則又嗟如與利見大人者異矣然而上承九四可因以萃五故无咎其无咎之嗟亦小吝耳无咎是本分嗟如小吝是餘意玩傳可見

吳氏澄曰與二陰萃于下而上無應故嗟嘆不得志雖無應而近九四之陽苟能往而上求九四之陽則

可无咎



九四 句 大吉无咎

傳大吉无咎位不當也

九四不中近五比陰是大臣之近君得衆者危地也
危事也在此位者非合羣下以奉一尊之大善難當
此萃矣傳曰不當位非君位也處萃之難地也

項氏安世曰無尊位而得衆心故必大吉而後可以

无咎胡氏炳文曰比卦五陰皆比五之一陽萃四陰皆萃五與四而五曰萃有位以見四之萃非有位也無尊位而得衆心非大吉安得无咎



九五句萃有位句无咎句匪孚句元永貞句悔亡

傳萃有位志未光也

有位九五也萃所當萃也匪孚九四也各有所萃也貞正也五正其位四不能分也彖所謂亨利貞也萃

二陽上一陰而下四陰轉若四之萃者多也故傳曰
未光

來氏知德曰九五當天下之尊為萃之主臣民皆萃
可以无咎矣然四分其萃未免匪孚上溺陰私未免
有悔故必反已自修俾元善中正之德長永貞固斯
悔亡而人孚矣



上六

齋咨涕洟无咎

咨虞翻李鼎祚俱作
資又曰咨同俱誤

傳齋咨涕洟未安上也

上六萃之極不得萃矣四方歸附而一人向隅能無泣乎其艱碗不安形為齋咨至于涕洟怨艾之深尚可免咎視比之後夫又稍異矣



升

句元亨

句用見大人勿恤

句

南征吉

升鄭作昇

傳柔以時升巽而順剛中而應是以大亨用見大人勿恤有慶也南征吉志行也大象地中生木升君子以順

德積小以高大序卦聚而上者謂之升故受之以升

四陰二陽萃之覆推萃坤下兌上而此則坤上巽下
六得進而居五衆陰因風而上故名升內巽而外順
九二得中六五應之彼此合德而上下相須大亨之
道也以剛中之德遇虛中之主見且恨晚何恤之有
征行也由巽而坤皆行南方升象在焉行之而順志
无不得故吉



初六 句 允升 句 大吉

傳允升大吉上合志也

允信也柔以時升坤也初六柔爻與坤同體坤之所
以升即初之所以升也上與四合即與坤之全體俱
合其心甚孚故曰允方升之初志可知矣大吉之道
也

來氏知德曰本卦原是坤土上升初與四皆坤故允
升



九二句孚乃利用禴句无咎

傳九二之孚有喜也

剛健得中上應六五之主此象所謂剛中而應者相信之深不假外物語曰苟有明信要之以禮澗溪沼汙之毛蘋蘩藇藻之菜筐筥錡釜之器潢汙行潦之水可以薦於神明可以羞於王公則利用禴之謂矣何咎之有傳曰有喜益知其无咎矣禴時享祭之薄

者祭薄而誠至也。弔為臯上與五孚有升歆之象。故以祀言。詩曰：上帝居歆，胡臭亶時。毛西河譏禴為薄祭之無理。然以東鄰殺牛不如西鄰之禴祭，實受其福。觀之則禴之為薄祭亦明矣。以時享視郊禘，故薄也。



九三

句

升虛邑

傳升虛邑無所疑也

上坤有城邑之象陽實陰虛坤純陰故曰虛邑九三
當上升之際以剛正之才臨至順之境一往莫禦傳
曰無疑亦卦情也



六四

句

王用亨于岐山吉无咎

亨享通

傳王用亨于岐山順事也

柔以時升五其主也四近五疑于迫矣而以六居之
則在坤體柔順之初不為躁進有土者祀其所祀而

神明享文王三分有二以服事殷祀其封內用此道也順之至也故傳曰順事



六五

句

貞

句

吉

句


升階

傳貞吉升階大得志也

六五當升之時居尊位以柔中之德下應九二其升甚大而從容有序彖所謂柔以時升者也貞正也即中正而應也吉之道也階拾級而登順且易也故曰

升階

熊氏良輔曰以順而升如歷階然



上六

句

冥升

句

利于不息之貞

傳冥升在上消不富也

冥昧也上六陰昧升已極矣而猶不知止故曰冥不
息之貞止也消退而不敢據也坤變艮則止矣此與
豫上正同彼樂極而不知返此進極而不知退故皆

曰冥彼變離為明故有渝而无咎者此變艮為止故
利于不息之貞又與晉上之義通彼當晉極之剛故
曰角此當升極之柔故曰冥然皆有不已之心可以
自治彼剛故維用伐邑此柔故利于不息之貞
石氏介曰已在升極是昧于進升之理若能知時消
息但自消退不更求進乃利也



困

句

亨

句

貞

句

大人吉

句

无咎

句

有言不信

傳困剛揜也險以說困而不失其所亨其惟君子乎貞
大人吉以剛中也有言不信尚口乃窮也太象澤无水
困君子以致命遂志繫辭困德之辨也困窮而通困以
寡怨序卦升而不已必困故受之以困

三陰三陽與并覆推坎剛而兌柔二五剛而三上柔
皆壓乎剛而不得舒傳曰剛揜而困之名義顯矣坎
險兌說有可亨之理以九二九五之剛中也貞也大
人也吉之道也又言无咎者以當困之時似不免咎

矣而剛中貞吉實所以亨困之道故无咎然而兑說
于外言語之象柔美無實失所為貞無可亨之道矣
故曰尚口乃窮



初六句臀困于株木句入于幽谷句三歲不覿木陸德明作木

謬

傳入于幽谷幽不明也

困而在于初初而又為六是困之最深而陰暗之至

不能自振者也株木身猶言椿木如所謂株守者也
凡人坐則臀居下臀困于株木則坐困之象也幽谷
陰僻之地坎象也坎初六曰入于坎窞是矣三歲不
覿困之久而不可見也離為明坎者離之反故傳曰
不明蓋愚陋之甚所以坐困之深也



九二

句

困于酒食朱紱方來利用享祀

句

征凶

句

无咎

紱鄭
作鞅

傳困于酒食中有慶也

本爻剛而得中與五同德貞也有大人之吉者然身在困中惟安於日用之常且飲且食所謂困而不失其所者至於九五同志則誠而奉之可也貞吉之理也亨矣不然處困之時而急急于征行則失所為貞故凶謂有中德而知悔僅可无咎而已困于酒食與征字對貞與不貞之別也朱紱方來利用享祀九五應而九二從也凶无咎拂九五之剛中而二當補過

也



六三

句

困于石

句

據于蒺藜

句

入于其宮不見其妻

句

凶

傳據于蒺藜乘剛也入于其宮不見其妻不祥也繫辭
易曰困于石據于蒺藜入于其宮不見其妻凶子曰非
所困而困焉名必辱非所據而據焉身必危既辱且危
死期將至妻其可得見邪

陰極乘剛石也困而不可轉也本為揜剛之主據非
其地而邪不敵正側足切膚如負芒刺又終不能自
脫至于死而後已凶之甚也困人者之自困如此初
六坐困不覲而止六三則妄行而困傷于外者必反
其家而剛柔相悖非其妻矣家將安歸

䷮

九四

句

來徐徐困于金車吝

句

有終

徐徐子夏傳作茶
茶翟元本同上肅

本作
余余

傳來徐徐志在下也雖不當位有與也

自內而外曰往自外而內曰來九四以初六為正應
陰陽相得志之所在故徐徐而來而體剛不中際困
之位乘坎車之上不免于困也故吝然九五剛中亨
困之主地分親切君臣相與以漸而合故有終蓋困
之所以亨惟剛中為能有之大人之吉九二有馬四
亦近之



九五

句

剝刑困于赤紱

句

乃徐有說

句

利用祭祀

剝荀爽王

肅陸績本俱作剝刑荀陸王俱作剝京房本作剝鄭云剝刑當作倪仇無據祭陸作享亦無據

傳剝刑志未得也乃徐有說以中直也利用祭祀受福也

截鼻曰剝去足曰刖上下皆柔揜乎剛者齷齪刑餘之人也赤紱貴者之服即九二方來之朱紱謂九五也以剛中之尊而上有上六下有六四為其所揜是以小人而困君子其初必有不遂之志至以中體觀

之則兌本從容和說而剛中之德誠敬之至足以交
於神明而況于人乎九二同德必同志矣此困之所
以亨也貞也大人之吉也誠以奉祭祀而實用祭祀
之誠以用人也祭天神祀地示尊者之事故屬五享
人鬼臣下之事故屬二



上六

句

困于葛藟

句

于臲臲曰動悔

句有悔征

句吉

說臲

文作剽薛本同說
文作舄薛本作杌

傳困于葛藟未當也動悔有悔吉行也

葛纏累之物藟亦葛類上六陰柔揜剛而處困終似
之困人者人恒困之而況九五乎況當困之已極乎
于此而危促不安曰動輒得悔此固困于葛藟之時
之心緒也然當此困之已極而猶不知變計則甘受
撓累何能出困惟其有悔心而即決然以行則困極
而亨此其時也故吉上六變乾健行者也故曰征征
則出困矣

九二征凶而此征吉何也曰彼亨困貴貞而此出困尚變也

或曰動悔有悔吉傳連而分句不連何也曰動悔連于競碗有悔連征吉字故另解其意曰行也是省括之句也



井句改邑不改井无喪无得往來井井句汔至句亦未

繻井羸其瓶句凶

羸蜀才作累

傳巽乎水而上水井井養而不窮也改邑不改井乃以剛中也汔至亦未繙井未有功也羸其瓶是以凶也大衆木上有水井君子以勞民勸相繫辭井德之地也井居其所而遷井以辨義序卦困于上者必反乎下故受之以井雜卦井通而困相遇也

困之覆推兌反為巽而來坎下坎往而居巽上是巽下入而水上行有井象馬卦之所以名也夫古之耕田而食者皆鑿井而飲是以八家為井四井為邑皆

養道也然雨公之奉不皆世及邑可改也而鄉田同井則仍不改其間之鑿井而飲者无所喪也亦無所得益有定分矣二五兩爻上下反易而剛中不易君子之不失其守似之夫分定者用亦不窮是以往來者皆井其井而資之以不匱由五之井冽至六之井收勿幕有孚是矣則井養之成矣若幾至于泉而井亦未可繙則功有不到終至于羸其瓶是失其所養歸于自棄又不僅井泥井谷而已凶之道也養之為道

豈可苟焉已哉

不從鑿井而飲井四為邑觀之則井邑之改不改及
无得无喪與爻辭之舊井无禽大象之勞民勸相皆
懸宕無著先儒亦多忽過



初六 句 井泥不食 句 舊井无禽

傳井泥不食下也舊井无禽時舍也

泥汙塞也水泉不通也不食不可食也井曷為乎泥

也舊井也廢棄之地也古者田賦出車蒐苗獮狩必獲禽焉井廢則田廢故无禽也是田賦所不到故泥也所以然者何也爻在本卦之下不能上行者也



九二

句

井谷

句

射鮒

句

甕敝漏

射苟作耶記甕說文作甕鄭作瓦

傳井谷射鮒无與也

谷竅也井有谷則出于泥矣然非八家所往來也惟射鮒而已鮒魚之小者莊子所謂周視轍中有鮒魚

者也今谿壑之間有小魚往來若織者即射鮒矣其
水甚淺雖異于泥然欲汲而不可得也甕更敝且漏
矣欲汲而无其具也九二雖剛中而尚在井下與五
之寒泉不應汲引之所不及故傳曰无與



九三

句

井渫不食

句

為我心恻

句

可用汲

句

王明

句

並

受其福

傳井渫不食行恻也求王明受福也

九三承坎離乎谷矣故潔潔可食此而不食則行者
惜之上坎下巽水木相接之際正汲象也故可用汲
國家之汲引人才視此矣上方虛已以接下王之明
也下亦實以承上臣之願也亦社稷之福也九三六
四相須之理也

蔡氏清曰為我心惻我指旁人所謂行惻也非指九
三自惻也可用汲帶連王明並受其福皆惻之之辭
也



六四

句

井甃

句

无咎

傳井甃无咎修井也

四居三五之間下有深井上有冽泉無以蓄之則深者谷且泥矣不能成冽泉之功故修之而不使汨于泥不致洩于谷泉之冽者賴之矣惟無應與故不言汲然不害其為自修之道也故无咎

來氏知德曰六四陰柔得正近九五之君蓋修治其

井以瀦蓄九五之寒泉者也。占者能修治臣下之職，則可以因君而成濟物之功，斯无咎矣。



九五 句 井冽 句 寒泉 句 食

傳寒泉之食以中正也

冽清也。井之色寒，泉寒而甘美也。井之味，食飲也。九五陽剛而中正，正坎之中滿，故其色清，冽其味甘。寒其質，則泉也。稼穡作甘，皆賴乎此。此同井者所共。

食也內養充裕足以濟物者也



上六

句

井收勿幕

句

有孚

句

元吉

收荀作甃誤
勿于寶作罔

傳元吉在上大成也

收取也幕揜蓋也井以上出為功水以流通為利象
曰巽乎水而上水井至於上則井成矣收而勿幕取
之無禁也象所謂往來井井也孚信也六比于五實
有泉源如期而至猶潮汐之言信潮也象所謂養而

不窮者也如此而後完井之量故辭曰元吉傳曰大成

李氏過曰初井泥二井谷皆廢井也三井渫則渫初之泥四井甃則甃二之谷既渫且甃井道全矣故五井洌而寒泉上井收而勿幕功始及物而井道大成矣



革句 巳日乃孚句 元句 亨句 利句 貞句 悔亡

傳革水火相息二女同居其志不相得曰革已日乃孚
革而信之文明以說大亨以正革而當其悔乃亡天地
革而四時成湯武革命順乎天而應乎人革之時大矣
哉大象澤中有火革君子以治歷明時序卦并道不可以
不革故受之以革雜卦革去故也

四陽二陰鼎之覆推睽之同體澤火有相滅之質兌
離有異配之志革之所以名也已已然也天下事害
不什不變法必見其害之已然然後人信之而不疑

十干甲首也庚更是故蠱方有事則曰先甲三日
後甲三日而傳曰終則有始巽以申命則曰先庚三
日後庚三日而傳曰無初有終此當改革之日如日
自甲而巳當庚之際故曰巳日乃孚而傳曰革而信
之也數以五而一變至巳則革之時矣舉當其時離
明兌說二五中正而應孚可知矣此大善亨通而利
且貞之道也革無不當悔之所以亡也以革之理言
則天地四時其大者也以革之事言則湯武革命其

大者也傳故特表之

李氏簡曰已日者已可革之時也先時而革則人疑而罔孚故已日乃孚何氏楷曰已日即六二所謂已日也乃孚即九三九四九五所謂有孚也悔亡即九四所謂悔亡也所以云已日者變革天下之事不當輕遽乃能孚信于人乃難辭也下三爻方欲革故而為新故有謹重而不輕革之意上三爻則故者已革而為新矣九四當上下卦之交正改命之時故悔

亡獨于九四見之即彖卦所謂革而當其悔乃亡也



初九句 鞶用黃牛之革

傳鞶用黃牛不可以有為也

革不可以輕試也當其初尚非可革之時堅其所守
慎而不發可也黃牛之革物之堅者借象也九之剛
正似之離為牛色黃故曰黃牛毛西河謂獸有皮而
改去其毛因以名革按此則書稱希革毛毳為革字

之通義黃牛之草當對虎變豹變看

劉氏牧曰下非可草之位初非可草之時要在固守中順之道而不敢有草也

龔氏煥曰易言黃牛之草者二遯之六二居中有應欲遯而不可遯者也草之初九在下無應當草而不可草者也



六二 句 已日乃革之 句 征吉 句 无咎

傳已日革之行有嘉也

彖曰已日乃孚則已日固當革之矣六二中正有慶
文明為體有革之才革之德而主之者五也與為正
應又以柔順當之則不敢自專固其分也然剛正之
主在上乘已日之有孚時乎時乎不可失也由是出
而從君撥亂世而反之正有相得益彰之美吉可知
矣何咎之有傳曰行有嘉征吉之謂也不征則失革
之時矣此二五之分也

三〇一

九三

句

征凶

句

貞厲

句

革言三就

句

有孚

傳革言三就又何之矣

剛而不中居革之介自用自專非喜事則徑情也革
太驟而害隨之故征凶三危地也實危道也九四九
五之所不與也第有應于上兌口相孚革有成言至
于三馬因以通五庶幾乎无妄爾傳曰又何之言不
以疾征而致凶也言有孚而已匪征也非已日之孚

也先儒謂此亦有孚而可革非也革必四五而後可也觀四之有孚改命可見



九四

句

悔亡有孚

句

改命吉

傳改命之吉信志也

水火既已相接則革之事行矣命令也如湯武之作誓作詰也九四剛而能下又近乎五當革之際方將創制顯庸與天下一變為新不得不革之時也而革

之為事出于非常疑有悔矣然以義制事即事以義起是草而當其悔乃亡也故曰悔亡是其草非私也是其命非美言小數也作新斯民天下信之故曰有孚悔亡而有孚然後可以改命也不然非有公天下之志而遽然改命四豈無慚德乎傳曰信志從悔亡有孚而知之也以四之能承五也




九五 大人虎變 未占有孚

傳大人虎變其文炳也

九五陽剛中正而居尊位為革命之主中天下定四海禮樂法度煥然一新本義所謂自新新民之極順天應人之時是也彖曰已日乃革之傳曰革而信之五之與二剛柔相應孚之至者可以不言而信也故曰未占有孚見之者曰帝王自有真也聞之者曰天下自此太平矣其亦未占有孚之謂乎

九五得乾之一體有利見大人之象而兌為卦體位

在西方其宿稱虎故不曰龍而曰虎乾德健舉故曰
飛草道武成故曰變虎之變也莫如秋兌正秋也鳥
獸毛毳光潔鮮明而虎可知矣傳稱其文威德寓焉
其次于聖作而物睹者乎



上六

句

君子豹變

句

小人革面

句

征凶

句

居貞吉

傳君子豹變其文蔚也小人革面順以從君也

上六柔順在外當革之既成內有剛正之主俯而從

之方宣力而効忠亦敷文而演武依日月之光見名
聲之爛蓋輔大人以成其草者故稱君子亦勲文治
以光其草者故曰豹變豹虎類也而虎則獸之王也
當虎變之時君子固豹變而興矣其在小人睹作新
之化亦相視而喜向之面從者至是且草面矣是天
下所歸往也草成而復他往則自外于大人之世矣
故凶惟居貞得柔順之正亦從君之道故吉

龔氏煥文曰九三與上六皆曰征凶而有貞厲貞吉

之殊者三之征凶戒其不可妄動也上之征凶謂事
之已革者不可復變也三當革而未革故守貞則厲
上已革而當守故居貞則吉三革道未成上革道已
成故也



鼎 句 元吉 亨

毛西河曰程傳以吉字作義文本義作
衍文皆無據而元吳澄本明季本本竟

從而刪之
何其妄也

傳鼎象也以木巽火亨飪也聖人亨以享上帝而大亨

以養聖賢與而耳目聰明柔進而上行得中而應乎剛
是以亢亨大象木上有火鼎君子以正位凝命序卦革
物者莫若鼎故受之以鼎雜卦鼎取新也

革之覆推革內之離往外六二上行而居五革外之
兌來內為與九二之剛與六五應而皆有中德與順
離明兩相為用是元善且吉而亨通之理也又水風
為井而火風為鼎取象甚類其義亦皆言養也然井
養者民而鼎養者貴其用又有大焉者傳故以享帝

養賢實之并及兩體而著其德之實焉



初六

句

鼎顛趾

句

利出否

句

得妄

句

以其子

句

无咎

傳鼎顛趾未悖也利出否以從貴也

顛倒也趾下也初在鼎下六動為用故曰顛趾鼎自
革來初當革故鼎新之始而二為鼎實初虛而就實
亦去故取新之象故利出否否宿穢也凡有事于鼎
者初必洗鼎亦其事也上離下巽皆女而六五位尊

初六位卑以六五而視初六則初固妾矣以其子以
其能生子也九二者六五之正應而初六承之陰陽
相與有生育之理焉妾能生子則母以子貴不害其
為陽也故无咎

以其子與利出否對其義亦同出否傳曰以從貴也
而得妾以其子不復釋者亦以其從貴也以初六九
二有生新之理也先儒俱謂以其子為應四尚未知
誰之為妾誰之為貴也



九二

句

鼎有實

句

我仇

句

有疾不我能即

句

吉

傳鼎有實慎所之也我仇有疾終无尤也

陽實陰虛九二居鼎之中則鼎之實矣有能有其實也詩曰旨且有是也中也鼎之主也仇匹也謂六五也詩曰公侯好仇又君子好速傳曰速與仇同則不必其為怨耦也六五者九二之正應是固其匹矣而下乘初六若有嫉妬之象焉而九二得中六五正應

不昵于初莫得而疾之故曰不我能即並妻匹嫡之禍所由遠也故吉先儒皆以仇為怨耦故謂初為仇而所謂疾與不能即者皆空泛無著且不知二之守正者何在也傳之所謂終无尤者亦不知其何故也胡氏炳文曰鼎諸爻與井相似井以陽剛為泉鼎以陽剛為實井二無應故其功終不上行鼎二有應而能以剛中自守故吉



九三句鼎耳革句其行塞句雉膏不食句方雨虧句悔
終吉

傳鼎耳革失其義也

三當水火相接之際鼎革互換之位以九居之過剛
失中如鼎之方中而耳忽革又無應與上下不屬舉
莫能勝故其行塞六二離明鼎中之腴也而隅四不
遇離為雉六柔為膏故曰雉膏不食夫雉膏之美鼎
所自有也而以耳革行塞失之是自有而自失之也

悔矣然離明在上而光不到虧也至巽變為坎則雨
矣坎以承離有水火相濟之理鼎之用也始雖有悔
而終則吉蓋所以救耳革之失也

虧失也傳所謂失其義也方雨虧言虧在方雨之際
也離不照也巽變為坎則虧者滿矣言其失之可救
也故申斷之曰悔終吉先儒以方雨虧悔為句來氏
知德以方雨為句虧悔又句俱未協

胡氏炳文曰井鼎九三皆居下而未為時用井三如

清潔之泉而不見食鼎三如鼎中有雉膏而不得以
為人食然君子能為可食不能使人必食六五鼎耳
三與五不相遇如鼎耳方變革而不可舉移故其行
不通然五文明之主三上承文明之照以剛正自守
五終當求之方且如陰陽和而為雨始雖有不遇之
悔終當有相遇之吉井三所謂王明並受其福者亦
猶是也



六四

句

鼎折足

句

覆公餗

句

其形渥

句

凶

形渥晁氏本
作刑劉鄭氏

本渥亦

作剷

傳覆公餗信如何也繫辭子曰德薄而位尊知小而謀大力小而任重鮮不及矣易曰鼎折足覆公餗其形渥凶言不勝其任也

剛而不中三陽重疊一陰居下不能相承折矣鼎實既滿勢重而力不能任覆矣四近君故曰公餗當尊而敗公自顧赧顏故形渥夫餗之覆四之剛重為之

也繫辭所謂德薄位尊知小謀大力小任重是也本傳所謂信如何者即所謂不度德不量力也

胡氏炳文曰初未有鼎實故因顛趾而出否四已有鼎實故折足而覆餗

形渥舊有作刑剭解者釋文云剭重刑京房云刑在頤為剭又周禮司烜氏屋誅謂所殺不于市而以適甸師屋讀如其刑剭之剭此于爻義無所證而本文其形渥猶詩渥赭渥丹之類正德薄位尊知小謀大

力小任重者自愧之狀傳曰信如何亦形容之辭未嘗有刑辟之意朱氏震曰其形渥羞赧之象澤流被面沾濡其體也此為得之



六五 句 鼎黃耳 句 金鉉 句 利貞

傳鼎黃耳中以為實也

黃耳中五之虛也金鉉貫上之剛也鼎至黃耳而金鉉則實在其中矣九二曰鼎有實本爻之傳曰中以

為實意正相因利貞云者貞正也即中也六五柔中
故利貞五與二應實其所自有也而必及金鉉者上
九陽剛之助所以成鼎之功不可相離故也非正其
能合乎

鉉徐邈曰讀局儀禮設局冏鄭元註今文局為鉉陸
德明曰局鼎扛也又公食大夫禮右人抽局士虞禮
左人抽局註局即鉉字西河易註曰儀禮謂之局周
禮謂之冏攷冏舊註云與局同以木貫鼎从冏音同

與甬異正韻亦云甬與局同甬與冪冪同各為音義然六書鼎部有甬無甬是局甬本二物二義而以為一音者誤也至局之為鉉則無異義然局無用金玉者或鉉即甬而不必別為甬與以鼎之上觀之其象亦若甬然




上九 句 鼎玉鉉 句 大吉 句 无不利

傳玉鉉在上剛柔節也

鼎之為用主於調和若偏剛偏柔如五味之專一則失其節矣上九與六五相比既剛柔之得宜而九居六上又有剛而從柔之道是鼎之成也享上帝而養聖賢之寶器也以觀其上蓋鉉而飾之以玉者然剛柔協而五味齊用之貴行之利故其占曰大吉无不利

程子曰在上為鉉雖居无位之地實當用也與他卦異井亦然

易氏祓曰鼎與井其用在五而其功皆在上井至上而後為元吉鼎至上而後為大吉皆所以全養人之利者也



易翼宗卷五

欽定四庫全書

經部
易翼宗卷六

詳校官宗人府丞臣寶光肅

通政使司副使臣莫瞻菴覆勘

總校官檢討臣何思鈞

校對官中書臣高中

膳錄監生臣施華

欽定四庫全書

易翼宗卷六

湖北巡撫晏斯盛撰

下經



震

亨

句

震來

句

虩虩

句

笑言

啞啞

句

震驚

百里

句

不

喪

七

以

震歸藏

作

簾

虩

荀

爽

作

愬

毛

季

本

四

同

從

之

何

無

忌

憚

至

此

傳震亨震來虩虩恐致福也笑言啞啞後有則也震驚
百里驚遠而懼邇也出可以守宗廟社稷以為祭主也
大象洊雷震君子以恐懼修省說卦雷風相薄雷以動
之帝出乎震萬物出乎震震東方也動萬物者莫疾乎
雷震動也震為雷震為足震一索而得男故謂之長男
震為雷為龍為玄黃為萑為大塗為長子為決躁為蒼
筤竹為萑葦其於馬也為善鳴為馵足為作足為的顙
其於稼也為反生其究為健為蕃鮮序卦主器者莫若

長子故受之以震震者動也雜卦震起也

以八卦言則乾交於坤之初以六十四卦言則於艮
為覆推陽動於下故名震陽動則嘉故亨震來兩震
相重震而又震即大象所為洊雷也虩虩恐懼貌敬
也啞啞赤子之初聲又讀如危鎮定之至一笑一言
有常度也百里侯國之地凡雷之動聞於百里聲之
所至境內皆震也執七薦鬯主祭者之事即所謂主
器也震為長子而初爻剛正故繼體出治臨事變而

守不失也敬以主之德足長人矣

號號敬也非眩也啞啞有則也非放也不喪七毫有則之實也不忘所有事也居處恭執事敬其常也不必其震來然臨事而懼不疑所行亦並行不悖矣胡氏炳文曰震驚百里以震雷取象不喪七毫以長子主器取象



初九句震來句號號句後句笑言啞啞句吉

傳震來虩虩恐致福也笑言啞啞後有則也

此爻成卦之主以故全用象辭止加一後字以明之
而直斷其吉言此即象所謂震來虩虩笑言啞啞者
然必敬謹之至而後言笑有則虩虩者主於中而後
啞啞者形於外也



六二

句

震來

句

厲

句

億喪貝

句

躋於九陵

句

勿逐

句

七日

句

得

億偽古本作億謬

傳震來厲乘剛也

震來震之初來也厲危也陽方震動六二迫而乘之
危地也億多也六五象傳訓大是也喪貝躋於九陵
失其所有至於最遠之地也九陽數之極也陵林木
叢薈之處震之為也勿逐能自守也以六二之柔順
而中正也敬天之怒無敢馳驅也七日少陽之數剛
退而柔安故失者可得也處震之道莫善於敬二雖
不如五之无喪有事然亦能自守而有得



六三 句震蘇蘇 句震行 句无青

傳震蘇蘇位不當也

六三以柔處下卦之極不中不正故震之一終而遂
蘇蘇然不甚驚懼也與虢虢者異矣震行對震來震
往而言此又震之一終如雷聲之已行也凡雷之震
既已發聲則其勢愈盛更當自省其身使无一青不
得蘇蘇然少釋其恐懼也



九四

句

震遂

句泥

傳震遂泥未光也

內震已成則遂矣至九四而陽陷于上下羣陰之中則泥而不通是失震之所為亨者

胡氏炳文曰初與四皆震之所以為震者然震之用在下四溺于陰柔之中故震之亨在初而不在四



六五 句 震往來厲 億无喪有事

傳震往來厲危行也其事在中大无喪也

往謂內卦來謂九四六五得震之最中往者已然來者同體遠鑒近察皆為震地蓋無時無處不自厲也然震而得中敬以直內中有所主故不喪其所有事五之所事至大也故曰億无喪有事而傳釋之曰大无喪也彖所謂不喪也豈彖傳所謂出可以守宗廟社稷為祭主是也

震之往來當在四而四泥矣不若五之光也震之不喪七毫當在初也而五則出而守宗廟社稷矣初者震之主爻五者震之正位合初與五觀之而彖義始備震來虩虩恐致福即往來厲之心也笑言啞啞後有則即億无喪有事守宗廟社稷以為祭主之本也虞氏翻曰可以守宗廟社稷為祭主故无喪有事也熊氏良輔曰震往亦厲來亦厲皆以危懼待之故能无喪有事蓋不失其所有也此卦辭所謂不喪七毫

能主器以君天下者與



上六 句 震索索 句 視矍矍 句 征凶 句 震不于其躬 句 于

其鄰 句 无咎 句 婚媾有言

傳震索索中未得也雖凶无咎畏鄰戒也

震極矣索索然志氣之消沮也故其視矍矍然神貌
之閃鑠也上六陰柔之至中無所主故也志先亂矣
行將何之凶道也然沮喪者固敗行而儆戒者可無

虞也當震之未及其身方及其鄰之時而早圖之則
修省生于恐懼雖未能致福亦可寡過也故无咎鄰
比近于身者謂六五六五震往來厲不敢康寧如彼
上六當觀此而知戒也上六變而成離長男中女有
婚媾之象又為噬嗑故有言而連類及之見不可徒
震也

趙氏光大曰陰處震極故當震之來志氣消沮瞻視
傍徨驚懼之甚也以是而行其志先亂凶也所以然

者不能圖之於早也若未及身而方及鄰之時豫為圖之則无索索矍矍之咎矣



艮其背

句

不獲其身行其庭不見其人

句

无咎

傳艮止也時止則止時行則行動靜不失其時其道光明艮其止止其所也上下敵應不相與也是以不獲其身行其庭不見其人无咎也大象兼山艮君子以思不出其位說卦山澤通氣艮以止之成言乎艮艮東北

之卦也萬物之所成終而所成始也故曰成言乎艮終萬物始萬物者莫盛乎艮艮止也艮為狗艮為手艮三索而得男故謂之少男艮為山為徑路為小石為門闕為果蓏為闔寺為指為狗為鼠為黔喙之屬其於木也為堅多節序卦物不可以終動止之故受之以艮艮者止也雜卦艮止也

周子曰艮其背背非見也靜則止止非為也為不止矣其義也深乎

以八卦言則乾交於坤之三以六十四卦言則與震
相覆推陽止於上陽外陰內各止其所而彼此敵應
若有所限者然故名艮一陽二陰卦象如人之背艮
文如身之反故曰艮其背凡人見其前不見其後背
者人所不見之地也艮其背則身不可得而跡矣身
不可得而跡識蓋居天下之先矣識居天下之先其
行實不處天下之後將跡其行乎當于其庭而行其
庭已不見其人矣其行固在衆行之先矣是其行也

即其止也。豈復有人之見哉。事物紛紜動矣。然各止其所而不亂。則亦靜也。所謂動亦靜也。此艮之大義也。艮為門闕。故言庭。

玩傳艮其背一句。是主不獲其身。行其庭不見其人。三句相連中著。是以二字更明。總是靜為主。則動亦靜。不滯於行。斯止之極也。道理十分圓相。先儒以艮其背。行其庭。平對者。皆失之。千里蔡氏清曰。天有四時。冬不用地。有四方。北不用人。有四體。背不用一。

理也蓋體立而後用有以行此理若充得盡即是定
之以中正仁義而主靜陳氏瑅曰背者北也人之一
心靜之所養有淺深則發之所中有多寡而於靜全
無得者一步不可行也二說得之



初六

句

艮其趾

句

无咎

句

利永貞

趾荀作
止通字

傳艮其趾未失正也

艮取象於身則初即其趾也凡人之行其趾先動六

柔得止之正故曰艮其趾艮其趾則不妄行矣故无咎然趾易動者也六柔貞也即正也必永其貞斯不失艮之初意也不然趾不自禁而能為艮乎



六二

句

艮其腓

句

不拯其隨

句

其心不快

拯陸

作承

傳不拯其隨未退聽也

上下敵應五雖同德而陰必從陽故六二舍五而比三陰陽有相與之象欲止而不能自主者也凡卦從

上者進從下者退比三而不從初故傳曰未退聽取象于身在限之下趾之上則腓也腓足肚也不動者也然隨足而動其必然之勢不能止也是違心而動也故不快

咸二曰咸其腓此曰艮其腓象之同也皆艮之下體也三曰咸其股執其隨往吝義之同也咸隨四而此隨三也陰陽之相牽也



九三

句

艮其限

句

列其夤

句

厲薰心

夤鄭作腴說文作艸荀作腎

傳艮其限危薰心也

限上下體之交腰際也夤夾脊骨也薰蒸動也沖也
猶言憂心沖沖也止其所而後為艮人之一身上下
運動皆在其限則限非可止之所也而九三以剛居
之堅確之甚止其所不當止若艮其限者然艮於其
限則其間之骨節堅強不可運動又若橫列其夤矣
危道也身危則心不安故厲薰心此所謂氣壹動志

者也

楊氏啓新曰此爻惡動以為靜而反至于動心者蓋
心之與物本相連屬時止而止時行而行則事應于
心而心常泰然有意絕物則物終不可絕而心終不
可靜矣



六四 艮其身句无咎

傳艮其身止諸躬也

限以上身之正體一止則無不止矣然艮之為道艮其背必不獲其身也而四之為止僅在其身是能止於有形而未能止於無形也免咎而已守身而安非復艮限列黃之厲亦無艮腓不快之憂

胡氏瑗曰人之體統而言之則謂之一身分而言之則腰足以上謂之身六四出下體之上在上體之下是身之象也夫人患不能自止其身今能止之得其道使四肢不妄動故无咎也



六五

句

艮其輔

句

言有序

句

悔亡

輔虞翻李鼎祚作孚

傳艮其輔以中正也

六五得中中則無不中於理者而於人身若口輔然
口容止止非默也言中倫倫序也序則其止也斯所
謂止其所之一端矣夫駟不及舌悔也言之无序也
詩曰莫捫朕舌捫則艮矣故艮其輔而後无悔也
龔氏煥曰艮其輔非不言也言而有序所以為艮也

谷氏家杰曰止在言前非出言方思止也然有序為
止亦非緘默之謂也



上九 句 敦艮 句 吉

傳敦艮之吉以厚終也

敦厚也以陽止陰之謂艮而本爻在重艮之上當艮
之終要艮之成止之極也定且靜而物不能搖也是
之謂厚艮其背不獲其身之究竟也艮背體之神敦

艮用之實主靜者必自得之

胡氏炳文曰敦臨敦復皆取坤土象艮山乃坤土而隆其上者也其厚也彌固故其象為敦其占曰吉艮之在上體者凡八而皆吉



漸句女歸吉句利貞

傳漸之進也女歸吉也進得位往有功也進以正可以正邦也其位剛得中也止而巽動不窮也大象山上有

木漸君子以居賢德善俗序卦物不可以終止故受之以漸漸者進也雜卦漸女歸待男行也

漸歸妹與咸恒似以四卦皆乾坤之子女而剛柔內外有相交之理故取象於夫婦嫁娶之事咸曰取女此曰女歸彼少男少女之相感此少男長女之中應也漸辭曰女歸下卦曰歸妹彼少女長男之相從此少男長女之相訂也本卦與歸妹覆推故雜卦曰漸女歸待男行也歸妹女之終也義尤顯切漸者禮之

始也禮始于謹夫婦女之歸最為有漸納采問名納吉納徵請期親迎六禮備而後成婚是漸莫如女之歸也艮止于下而巽進于上是止以為進亦漸也漸本進而有序之文女歸則漸之義矣吉得其義也利貞爻之中也以歸妹覆推則下卦之兌上進為巽而九二居於九五位既尊而有功陽剛得中又正而可以正人貞之道也故利貞



初六

句

鴻漸于干

句

小子厲

句

有言

句

无咎

傳小子之厲義无咎也

鴻之賓也隨陽南北而其行有序卦體陰陽相次乙
乙徐徐亦似雁行故爻俱取鴻象婚禮用雁義亦然
也干水涯也初六漸之最初柔弱處下而不進若舍
磐之安而不有者似危也故無識者疑之是厲也因
厲而有言言誚讓也此亦小子則然耳然以漸之義
揆之則正慎始安身之道故无咎用柔所以不躁而

能漸也觀晉初之權如可知同一難進之義矣若升之初六曰衆允則以其為卦主也義自不同



六二

句

鴻漸于磐

句

飲食衎衎

句

吉

磐史記漢武紀引作般註云水涯堆

也

傳飲食衎衎不素飽也

磐大石也廣澤大阿之間有之水鳥栖息之所衎衎從容而不競也必于磐而後得飲食之衎衎則前乎

此者有漸也飲食衎衎以圖進則後乎此者有漸也
蓋鴻之為物秋南春北未嘗寧處故飲食衎衎非終
安乎此也傳曰不素飽其義精矣漸之最中正者也
又有應于五也

胡氏炳文曰艮為石則有磐象鴻食則呼衆飲食衎
衎和鳴也初之小子厲有言危而傷也二飲食衎衎
安且樂矣時使之然也



九三句鴻漸于陸句夫征不復句婦孕不育凶利禦寇

孕荀作
乘誤

傳夫征不復離羣醜也婦孕不育失其道也利用禦寇
順相保也

以剛而處危地失所為漸者也陸路也如南陸北陸
之陸鴻之為物木落南翔水泮北歸此隨日之南北
陸以為行也即漸也而九三過剛又無應與秋未立
而遽南春未立而遽北其去也獨行無侶非上九漸

陸之義惟一往不返耳九陽爻故稱夫將遽進而以
巽女為婦耶陰陽相比似可以孕矣然少男長女時
未至也非夫婦之道不可以生育凶可知矣其剛急
之性將何所用哉惟寇之至也禦之以健捷則退所
謂漸不可長者此則其利也內卦艮象止也于義為
順故可以相保



六四

句

鴻漸于木

句

或得其桷

句

无咎

傳或得其桶順以巽也

巽為木六四柔而下乘故為桶桶柯也鴻本不木栖而當漸之交又巽之下體適漸于此未可托也然柯尚可容足不至顛墜得柔順之道不失漸之義故无咎進近九五四多懼而以柔處之故安也以陰從陽亦順事也

房氏喬謂上附于五可也其謂五為桶則不可也九五尊而高非足履之象惟以本爻之柔為平柯而托

乎其間以附五斯得之君臣之義夫婦之道也



九五

句

鴻漸于陵

句

婦三歲不孕

句

終莫之勝

句

吉

傳終莫之勝吉得所願也

鴻或南陸北陸以為飲食之所耳磐則其所也于陵則已遠矣然九五得中于陸為儀即在其上無所間也豈至於九三之失道孕而不育哉以婦道言之亦不過三歲不孕而已漸之貞也本卦歸妹之反故兼

以婦道為象即彖之女歸同一意也



上九句鴻漸于陸句其羽可用為儀句吉

傳其羽可用為儀吉不可亂也

陸胡氏程氏本皆云當作逵朱子謂以韻讀之良是
至范諤昌吳澄季本直改作逵皆非也朱氏震來氏
知德毛氏奇齡知陸之不可改為逵而朱氏據虞翻
以九三為陸謂上所往進也所反亦進也漸至九五

極矣是以上反而之三來氏謂九三之中爻水在山
上故自干而陸此文變坎又水在山上故又有鴻漸
于陸之象毛氏謂上與三為表裏上弭極即三止極
故復漸于此亦非也陸字漢隋以後竝無訛誤隋盧
思道孤鴻賦序云大易稱鴻漸于陸羽儀盛也是其
傳已久若以韻證則達儀不叶顧氏炎武曰古人讀
儀為俄不與達為韻足破前誤至謂上復漸于三又
大失爻理不知陸之為路不必其為達也不知漸之

各異不得以為三也日行南陸則鴻漸而南日行北
陸則鴻漸而北三未極而漸陸故離羣而失道上已
極而漸陸則羣飛翱翔行列整齊故其羽可用為儀
儀也者徐徐然有次第也乙乙然相聯屬也傳曰不
可亂正以其行列言也為異說者當細玩之



歸妹

句征

凶

句无攸利

傳歸妹天地之大義也天地不交而萬物不興歸妹人

之終始也說以動所歸妹也征凶位不當也无攸利柔乘剛也大象澤上有雷歸妹君子以永終知敝序卦進必有所歸故受之以歸妹雜卦歸妹女之終也

歸妹漸之覆推與咸恒悖異反為兌為少女妹象也艮反為震為長男而兌女下之歸也然女先而男後女說而男以動是女為主故不曰妹歸而曰歸妹也婦人謂嫁曰歸嫁娶之道男先于女六禮行而後成婚此咸之所以取女吉漸之所以女歸吉也今不

以漸而歸者妹非咸之正失恒之道者其體則陰爻
皆外而陽居內其象則女先而男後行之悖理凶可
知矣不特此也二剛而三乘之四剛而五乘之是婦
將制其夫矣復何所利哉不善如此總之此為漸之
反而大遠於咸恒者是故士女之行禮為大失禮者
凶必隨之



初九 句 歸妹以娣 句 跛能履 句 征吉

傳歸妹以娣以恒也跛能履吉相承也

爾雅女子同出謂後生為娣曲禮世婦姪娣是娣者
女弟從嫁者也兌本少女而初又居其下則娣象矣
人之四肢下者為足兌體為毀折又變坎為陷為曳
是跛也然有陽剛之德而尚可支撐中饋是能履也
居下而承上可也雖不及遠其分為善以是而行亦
吉也女歸不待男非禮也亦失時也初為娣則從嫁
之媵於禮未失於時可待也卦征凶而爻征吉其分

異也



九二

句

眇能視

句


利幽人之貞

傳利幽人之貞未變常也

歸妹陰陽之相應者惟二與五而以陽承陰近與六
三相比正當兌之上缺是眇也然本體剛而得中則
目未盡盲也故能視而其為剛中也為陰所掩則幽
隱之地矣第不為三所比昵而自守以中是即貞也

婦人之常道也則其利矣不然非剛明在中得無變節乎

胡氏一桂曰初二跛眇兌毀折象履卦六三亦兌體故取象同



六三

句

歸妹以須

句

反歸以娣

須荀爽陸績作繻誤

傳歸妹以須未當也

須女之賤者天文織女貴須女賤志曰須女四星賤

妾之稱六三不中不正居長男少女之間是婢妾之類而居卦下之上是又與妹為同體則娣矣長男在上尚非配也須不當也娣愈不當也取女之吉何有焉彖所謂无攸利者也



九四

句

歸妹愆期

句

遲歸有時

傳愆期之志有待而行也

剛而失中又處可懼之地未成其為歸妹也故曰愆

期愆期則非歸妹之征凶矣彼有取女之吉此有女歸之漸故曰遲歸有時傳稱其志者剛而實也

屯

六五

句

帝乙歸妹

句

其君之袂

句

不如其娣之袂良

句

月幾望

句

吉

幾荀作
既誤

傳帝乙歸妹不如其娣之袂良也其位在中以貴行也君即所歸之妹也如諸侯妻稱小君後世稱縣君之類對娣媵言此則君矣本爻位尊而柔順得中下應

九二是天子之妹下嫁于諸侯之象貴盛其所自有
謙而不居故服飾其所自有儉而不奢也是以娣之
袂反覺美焉衣之飾在袂故特舉之月與日相對謂
之望月受日之光者也六五下應九二正相對也曰
幾者不自滿也此爻得泰之六五故其辭同而于歸
妹之義則于禮獨合何也凡婚禮男家主之而王姬
下嫁之禮則女家主之在彖自凶而此爻自古觀會
通以行典禮此其顯者



上六

句

女承筐无實

句

士刲羊无血

句

无攸利

傳上六无實承虛筐也

筐鄭作匡
古通字

上六歸妹之究竟而本爻陰虛處外且承應皆陰將何所承乎是婦終不成其為婦也不成其為婦則夫無以祀先故刲羊亦无血此彖所謂征凶无攸利者也故以全體觀則兌女也震虛筐也震又男也兌之不配則无血之羊也象之所以為辭也

程子曰上六女歸之終而无應女歸之无終者也婦者夫所以承先祖奉祭祀不能奉祭祀則不可以為婦矣筐篚之實婦職所供也古者房中之俎菹醢之類后夫人職之諸侯之祭親割牲卿大夫士皆然割取血以祭禮云血祭盛氣也女當承事筐篚而无實无實則無以祭謂不能奉祭祀也夫婦共承宗廟婦不能奉祭祀乃夫不能承祭祀也故割羊而无血亦无以祭也謂不可以承祭祀也婦不能奉祭祀則當

離絕矣是夫婦之无終者也何所往而利哉此傳相承而下正得聖傳專釋承筐无實之旨朱子本義未

協



豐

句

亨

句

王假之

句

勿憂

句

宜日中

傳豐大也明以動故豐王假之尚大也勿憂宜日中宜照天下也日中則昃月盈則食天地盈虛與時消息而况于人乎况于鬼神乎大象雷電皆至豐君子以折獄

致刑序卦得其所歸者必大故受之以豐豐者大也雜卦豐多故也

豐旅之覆推離明震動天地功用之大者明而動則百昌時遂百為交作百物俱備嘉之會也故亨假大也傳曰尚大言方大也勿憂憂也方豐大之時即為消落之漸能勿憂乎然日中者憂其昃惟常守其中則持盈保泰而豐者不至于嗇矣何也豐多故非明不足以照之物豐則明易蔽也惟中則物不足以蔽

之六五由艮內而為外震得中居尊為豐之主與離
二同德相應皆中虛而不自滿也明也豐之主故稱
王應離即宜日中爻辭來章之吉正發此旨

胡氏炳文曰豐之大有亨道焉大則必通也亦有憂
道焉大則可憂也不必過于憂如日之中斯可矣泰
晉夬家人升皆曰勿恤此曰勿憂皆極盛之時常人
所不憂而聖人所深憂其辭曰勿憂深切之辭非謂
無憂也



初九

句

遇其配主

句

雖旬无咎

句

往有尚

傳雖旬无咎過旬災也

配鄭作妃旬荀作均
劉炳作鈞俱古通字

彖曰宜日中離日也六二離之主而陰與陽配初九
六二一陽一陰故曰配主相比故曰遇旬十日也十
日之內猶然日中離明下照故无咎然時不可失也
日中幾何往則速遇故有尚言尚往也傳曰過旬災
見日中之為宜也

先儒俱以四為配主然兩陽非配亦非豐主又與宜日中之義不合不知離中為日之主也

來氏知德曰因宜日中文辭皆以日言文王象豐以一日象之故曰勿憂宜日中周公象豐以十日象之以一月論已一旬也正豐之時也

三

六二

句

豐其蔀

句

日中見斗

句

往得疑疾

句

有孚發若

吉

蔀鄭元薛仁貴本作苦斗孟喜本作主

傳有字發若信以發志也

離日也日以虛而明以實而蔽又火日內暗而部者
日積之數漢書律厯志七十六歲為部首又部日二
萬七千七百五十九部豐則交食日食甚則斗晝見
又部部也豐二離體上有重剛既實而多蔽又質陰
而無光故有此象往進也謂比三四蔽之者也故疑
孚合也謂應五虛相照也二有中德與五相信去其
所蔽則志共見矣故曰發若

部部也蔽也部蔽之至則日中而斗見本爻離中而兩剛相比不得驟與六五相應故有疑象疑者以重剛之蔽也先儒俱以上應六五為柔暗之君故疑非也六五本有來章之慶何謂柔暗部當作虛活字或以為草名皆別義如鄭元薛仁貴本作菩註云小席廣雅云葍部魚薺也俱與象義無涉且作實字則後所稱部其家者難通也

部部

九三 句 豐其沛 句 日中見沫 句 折其右肱 句 无咎

沛一作沛

子夏傳作沛沫漢書及字林子夏傳鄭元馬融本俱作昧肱姚信本作股

傳豐其沛不可大事也折其右肱終不可用也

沛當作旆王弼以為幡幔者是也部如步鄣之蔽旆則幄幔之施更切近矣沫斗杓後星最小難見日中見沫如日食之更甚而小星皆見也服虔謂日中而昏者是也離體陰陽切近無光故有此象卦例上右下左三為離上交折半則折其右肱矣居下卦之上

當豐大之時任大事者也然日中而昏不明之甚豈
所以為豐哉偏暗無為故傳曰不可大事蓋昏而不
明其體已虧何所用之如人之運動惟在右肱而傷
折其半終不可以任事也无咎云者言無所歸咎也



九四

句

豐其部

句

日中見斗

句

遇其夷主

句

吉

傳豐其部位不當也日中見斗幽不明也遇其夷主吉
行也

離為日本爻與日不相對照不能受光故豐節見斗
與六二同傳曰位不當謂陽處偏僻亦不當曰故幽
而不明但六五柔中為豐之主九四承之則剛柔相
遇亦相資也故吉夷正大也善也詩曰降福孔夷
不盡訓平也六五居尊故曰夷主六二離為下卦之
主故曰配主先儒以初為夷主不知四有近君之義
六五有居尊得中之慶也且主而又曰等夷亦不成
文義于彖辭宜日中之義亦全無關照又傳曰行也

是行而遇五也若遇初則反而退矣豈可謂之行



六五句來章句有慶譽句吉

傳六五之吉有慶也

此所謂宜日中照天下者也兩虛相含離明照耀正
豐而得中者無盈昃之慮也六五柔中居尊下有離
中文明之德為之應則章之來也方未有已而豫大
之慶美盛之譽其所自有此豐之最善而无憂者故

吉



上六

句

豐其屋

句

蔀其家

句

闕其戶

句

闐其無人

句

三

歲不覿

句

凶

豐說文作豐闕姚信本作窺闕孟喜本作室

傳豐其屋天際翔也闕其戶闐其無人自藏也

宜日中宜照天下而此則位處豐極在于天上不富天下而僅有其家者也豐其屋豐之極也蔀其家以自蔽也兩陰居中幽隱在內故窺其戶而闐寂無人

蔽之深也三歲不覿蔽之久也去日已遠不明之甚
盈且昃也故凶



旅

句

小亨

句

旅貞吉

傳旅小亨柔得中乎外而順乎剛止而麗乎明是以小
亨旅貞吉也旅之時義大矣哉大象山上有火旅君子
以明慎用刑而不留獄序卦窮大者必失其居故受之
以旅雜卦親寡旅也

旅豐之覆推離外而艮內離柔而艮剛家在外而止之若寄寓然豐內之離為旅之外卦而六五得中惟中故順而兩剛比近彼此相資又艮止離明而柔麗乎其中亨道也是所以亨者柔中為之也陽大陰小故曰小亨以德言之則止者不窮于所往明者不昧于所止皆正道也故曰旅貞吉不然行不知止必窮于行止而不明必失其所是亨雖小而義則大矣故曰道不可須臾離造次顛沛必於是也

胡氏炳文曰在旅而亨亨之小者也然事有小大道無不在大亨固利于貞不可以亨之小而失其貞也正道果可須臾離哉



初六

句

旅瑣瑣

句

斯

句

其所取災

斯郭京作懈據王本改之者失古文意

傳旅瑣瑣志窮災也

瑣瑣鄙細貌斯賤役其所取災猶言自辱也本爻陰柔不中處于最下觀其行止之鄙細是斯役之為也

以此處旅失路誰悲人以為行之窮也而實其志之窮也李斯見鼠而嘆以為安可如鼠顧其自處何如而不知其志之早失終如鼠也其所取災辨之可不早乎

王氏應麟曰旅初六斯其所取災王輔嗣注云為斯賤之役唐郭京謂斯合作𢇛愚按後漢左雄傳職斯祿薄注云斯賤也不必改𢇛



六二

句旅即次

懷其資

句得童僕

貞

九家易李鼎祚本童作僮

通字

傳得童僕貞終无尤也

次旅舍之所卽就也資與齎同聘禮所謂幾月之齎是也旅次所恃者資資之所恃者童僕倘其不貞則挾資而走或耗敗不貲旅次其能安乎六二柔順中正在艮之中則已止矣故為次陰爻為美利故懷資艮為少男而得其中以臨下故為童僕貞雖無六五

之譽已遠初六之災矣九三九四喪童得資均不如
者知柔中之善處旅也



九三

句

旅焚其次

句

喪其童僕

句

貞厲

傳旅焚其次亦以傷矣以旅與下其義喪也

旅小亨惟柔得之九三剛而不中是不能安於旅者
旅以外為家而上逼離火則焚次之象以止下者為
童僕而相隔重陰則喪失之義以剛居危當旅之界

故雖貞亦厲

丘氏富曰九三爻辭全與二反二即次而三焚二得
童僕而三喪二之貞无尤而三之貞則厲者二柔順
得中三過剛不中也過剛豈處旅之道哉



九四

句

旅于處

句

得其資斧我心不快

資子夏傳及衆家並作齊蓋齋

訛
字之

傳旅于處未得位也得其資斧心未快也

處詩曰于時處處是也四多懼而以剛乘剛非可處之地也非可處之地而處焉是旅而處者也失其所矣非所以安身也雖上近六五下應初六而得其資斧心終未快身未安故心未安也資財貨斧器用六五有美在中資也有資則必有斧



六五

句

射雉一天亡

句

終以譽命

傳終以譽命上逮也

人君無旅而五居尊位亦未可以等常視也火地之
晉也曰康侯火山之旅也其諸應得國之亡人乎如
公子重耳之在外十九年終反國而受天子之命是
也若夫少康之居有仍宣王之依周召光武之在南
陽未嘗非旅也一舉而光舊物亦未嘗不與爻辭合
也要之艮手離弓射象也離又文明則雉之象矣中
虛亡矢之象譽美名命詞詰皆文事離之光也六五
柔中而居尊位當旅之時有事戎行然一舉而可得

也一矢亡言亡一矢而獲之賈誼稱無亡矢遺鏃之
患言不戰也此曰一矢亡則一戰而克也終以譽命
則以文告終也傳曰上逮云者本卦與豐覆推離本
豐之下卦今離為上卦則自二而居五是上及也

程傳曰射雉謂取則于文明之道而必合如射雉一
矢而亡之發無不中則終能致譽命也朱子語類曰
亡字如秦無亡矢遺鏃之亡不是如伊川之說然程
予以亡屬雉固覺未合而以亡一矢若因雉而失之

亦非文意不知一矢亡言僅需一矢也



上九句鳥焚其巢句旅人先笑後號咷句喪牛于易

句凶

傳以旅在上其義焚也喪牛于易終莫之聞也

離為火火炎上上九剛踰處旅之極又為科上槁故有鳥焚其巢之象笑剛上自以為得意快志也後號咷遇災而悲也易場通牛離象變震為大塗又變小

過故有此象如處牧地而不自保致其所有者而失之凶可知矣前傳曰以旅與下此傳曰以旅在上義正相對下謂初與則九三之過剛自是不察其情之睽若棄所有而與之者然上即本爻故曰在以上之過高自喜不知其禍之至若適當有此者至喪牛于易則又知其終莫之救亦莫之悔矣

先儒專以喪牛于易為致凶之道上下文義隔絕然此爻旅之極過高自任罹災而終不知救者也傳曰

終莫之聞猶言人莫以告告亦不能聽也



巽

句

小亨

句

利有攸往

句

利見大人

傳重巽以申命剛巽乎中正而志行柔皆順乎剛是以
小亨利有攸往利見大人
大象隨風巽君子以申命行
事繫辭巽德之制也巽稱而隱巽以行權說卦雷風相
薄風以散之齊乎巽巽東南也齊也者言萬物之潔齊
也撓萬物者莫疾乎風巽入也巽為雞巽為股巽一索

而得女故謂之長女巽為木為風為長女為繩直為工
為白為長為高為進退為不果為臭其于人也為寡髮
為廣顙為多白眼為近利市三倍其究為躁卦序卦旅
而无所容故受之以巽巽者入也雜卦見兌

以八卦言則坤交于乾之初以六十四卦言則與兌
相覆推陰伏入于陽之下故名巽以兩巽相重觀之
則九二九五剛在巽中而五尤得正中正以行令則
風流而令行初六六四柔在剛下順而承之承順以

善下則風從而行遠以柔下剛言是陰之為也陽大陰小故曰小亨以其行之順而言則一往無阻故曰利有攸往以九五剛中居尊言則大人之位故曰利見大人

張子曰陰在內陽在外故周旋不舍而為風是陰陽相與也而陰為之內于義尤備朱子語類曰與有入之義與為風如風之入物只為與便能入義理之中無細不入此見與之性情



初六 句進退 句利武人之貞

傳進退志疑也利武人之貞志治也

六陰柔初巽下是以進退不決疑貳而趑趄也夫巽以申命而命方初下每懷遲疑將格而不行矣惟斷以定謀勇以作氣如軍令然有進無退斯克濟也此巽初之利也

王氏弼曰處令之初未能服令者也故進退也成令

齊邪莫善武人故利武人以整之



九二

句

巽在牀下

句

用史巫紛若

句

吉无咎

傳紛若之吉得中也

巽以申命牀坐而下令之所杜甫詩曰去歲茲辰捧
御牀又王建宮詞曰柘黃新帕御牀高又如庾亮之
據牀談詠王道之指牀呼坐是牀固所以坐而言也
五出令者也二行令者也初則奉令者也下而最親

又筮之所由名初固筮也以二視之則在牀下矣令
由中出不少遲留或卜吉征凶而付之史或祭祀祓
禳而付之巫紛紛若若承之者順也惟其令之自中
出也故吉且无咎非下之進退者可比也

令之善者言之而有與為聽紛紛若若聽之者衆也
二能用下也上之筮在四雖同在牀下而隔五不為
上用故凶

周禮太史讀禮協事司巫祝以孝告嘏以慈告又周

官史掌卜筮巫掌祓禳卜筮占吉凶祓禳除災害

毛西河曰禮王前巫而後史前後記告紛紛若若註云若多也史綬若若

荀爽謂史以書勲巫以告廟征伐既畢史巫竝用此承武人專以用兵言牽合未當



九三 句 頻 巽 句 吝

傳頻巽之吝志窮也

當上下兩巽之間故曰頻巽巽為風風之恒也為咎
徵巽以申命命之煩也為亂政上無應下無與將比
四乎又從五而不從三窮矣處頻巽之地則然吝道
也頻復者德之虧頻巽者命之亂也

毛西河曰三當下巽之終而接上巽之始以巽承巽
巽之頻者也夫下巽至三而巽窮上巽至上而巽又
窮雖三在過巽上在不巽而其巽之窮則一也按此
頻巽甚協其曰過巽則非也爻剛亦不巽也



六四

句

悔亡

句

田獲三品

傳田獲三品有功也

柔爻本致巽主象初之進退而疑者柔之穉也四之悔亡而有功者柔承五也九五本剛正之君而六四為柔正之臣近而相得往必有功巽風之動春田之時又為利三倍故所獲必多三品一為乾豆二為賓客三充君庖備舉之言其多也○四似初疑于悔矣

然上得九五與初不應則悔固亡之矣是四之善以柔而得五為功也故傳專及下句然言有功則悔之亡亦可知矣

郭氏雍曰六四近君志決于進無初六之疑則悔亡矣是以有田獲三品之功也六四至柔不應有田獵之功而以此順乎剛得之由是觀之則巽之為道豈柔弱畏懦之謂哉



九五

句

貞吉

句

悔亡

句

无不利

句

无初有終

句

先庚三

日後庚三日吉

傳九五之吉位正中也

五為申命之主以九居五正所謂剛弼乎中正而志行者故貞吉九二不應前命之阻也而以九五之剛正者更之則悔亡矣彖所謂大人為弼所利見故无不利此當兩弼之中是申命而非初也故曰无初命至重申則震動恪恭日新又新矣故有終前漢書歷

律志曰斂更于庚是更之為言更也言事至此而當更也更則申命于先也又必申命于後也初已往矣凡所以申命者皆為終計也先庚三日後庚三日則為終事計者周矣此所以有終也

程子曰先庚三日後庚三日出命更改之道當如是也甲者事之端也庚者變更之始也十干戊巳為中過中則變故謂之庚事之改更當原始要終如先甲後甲之義如是則吉也胡氏炳文曰蠱者事之壞先

甲後甲者飭之使復興起巽者事之權先庚後庚者行之使適變通張氏清子曰甲者十干之首事之端也故謂之終則有始庚者十干之過中事之當更者也故謂之无初有終况巽九五乃蠱六五之變以造事言之故取諸甲以更事言之故取諸庚易于甲庚皆曰先後三日者蓋聖人謹其始終之意也按此皆得先庚後庚正義而朱子本義以為先庚三日丁也後庚三日癸也說本鄭元而于義未當漢律厯志曰

火盛于丁未嘗解為丁寧也陳揆于癸未嘗專為揆
度也至毛西河以先庚三日為丁戊已後庚三日為
辛壬癸謂以庚為主木為金所克則去木之柔而用
金之剛甲乙為木巽方所屬行巽令者必去之甚為
鑿謬大易一書只道陰陽並無納甲生克消洩之義
知潔淨精微之教者必識之



上九

句

巽在牀下

句

喪其資斧

句

貞凶

傳巽在牀下上窮也喪其資斧正乎凶也

外卦之所以為巽者四也以上視之亦在牀下然上處卦外无位者也將以四為本卦巽入之資乎而五方尊臨在中惟命之從上不可得而有也是失其所資之象也故曰喪其資斧其喪也上自致之資斧非其所能有也故正乎凶傳意相承而下言喪其資斧正其窮之為也

向來牀俱以為卧榻不知古人坐卧皆牀也禮父母

舅姑將衽長者奉席請何鄉少者執牀與坐則亦不
竟稱卧也



兌亨句利貞

傳兌說也剛中而柔外說以利貞是以順乎天而應乎
人說以先民民忘其勞說以犯難民忘其死說之大民
勸矣哉大象麗澤兌君子以朋友講習說卦山澤通氣
兌以說之說言乎兌兌正秋也萬物之所說也故曰說

言乎兌說萬物者莫說乎澤兌說也兌為羊兌為口兌
三索而得女故謂之少女兌為澤為少女為巫為口舌
為毀折為附決其于地也為剛鹵為妾為羊序卦入而
後說之故受之以兌兌者說也雜卦兌見而巽伏也

以八卦言則坤交于乾之三以六十四卦言則為巽
之覆推二陽一陰陽內陰外如水之內渚而潤外濫
如草木百果鳥獸之內堅實而鮮潔外著故于水為
澤而于時為秋自爻觀之則初二四五剛皆在內三

上兩爻柔皆在外剛中正者說之實柔外見者說之
著說則人情相協事必亨通故直指之曰允亨也是
其說也皆以剛健中正者主之也故利貞傳剛中而
柔外正以說之實而言惟說故亨是其說本中正之
為也故傳曰說以利貞明其非驩虞小喜之所為也
推之至于順天應人而使忘勞忘死非中正而能之
乎不中正而能為說乎向來以剛中釋亨柔外釋利
貞未知聖傳之精即未知彖辭直指允亨之義亦未

審兌說之真也此以全體觀說不必破碎分晰也

乾道成男坤道成女則一陰二陽俱宜陰為主矣然自其既成女觀之則坤道也而其最初則仍是陽施而陰受蓋效法之謂坤此三女之用所以異三男也故兌與雖陰體而仍以陽為主也



初九句和兌句吉

傳和兌之吉行未疑也

爻剛無比在兌說之初赤子之性啼笑皆真禮所謂
不妄說人者也不妄說人則發皆中節故謂之和亦
和而不同矣私不得而干利不得而誘故吉本卦二
三四五上皆陰陽相比比則睽睽則同而不和不和
則疑即在所說之中矣惟初未與物牽行其心之所
安雖違衆亦不害其為和也故傳曰未疑



九二

句

孚兌

句

吉

句

悔亡

傳孚兌之吉信志也

二比三孚矣然三方來兌易致非道之說似未免于
悔然二剛而居中德足乎已而人信之來兌者亦不
得而亂之故吉且悔亡

孚德足以孚之也以我為主非來與引者之務在說
人也



六三 來兌 句 凶

傳來兌之凶位不當也

重兌交接之地以柔居之上下兩剛皆有可說一兌方成又來一兌故曰來兌左右逢迎巧言令色何所不至哉妄說人者辱及其身而莫之悟也故凶

來兌與頻巽相似謂居兩兌之間致說者來而不已也不中不正諧媚之心有感皆說人情見可欲而動其幾亦豈在遠哉



九四

句商兌未寧

句

介疾

句有喜

傳九四之喜有慶也

九四下比三上承五三陰柔而可說五剛正而當說
將說三乎則違五將說五乎則失三兩相商而未安
也然三本柔邪疾也五則剛中居尊有得君之象喜
也而三在下體非我同類五為同體實我尊親如田
之有界不可苟同也惟以三為疾而介不相亂則專
于承五而喜起一心矣情雖可商而分有定屬故傳

亦專釋喜

來氏知德曰四與三上下兩體猶疆介然故以介言之比乎五者公也故不敢舍公而從私比乎三者私也故不敢割情而就理此其所以商度未寧也商者四介者九

䷗

九五句孚于剝句有厲

傳孚于剝位正當也

剝陰剝陽也謂上六而九與之比則孚于剝矣有厲者危之也九五陽剛中正而擬其孚慮其危者當允之尊位容悅者衆而六以兌極相引志在剝陽近而易入勢有可危然不至咎凶者剛中正者為之也惟其為剛中正也故其孚也尚懸擬之其厲也亦若為或有之見其實可以自主也彖所謂說以利貞者也履之九五健體皆因其位而象之錢氏一本曰允五說體與履五健體不同履五健體恐其和之難危在

夬兌五說體不覺其說之易危在孚故皆有厲之象

○
䷪

上六

句

引兌

傳上六引兌未光也

上六重兌之所由成說之極而不自已引而長之不知所終故曰引兌而傳曰未光言其陰柔而暗昧也
毛氏璞曰所以為兌者三與上也三為內卦故曰來上為外卦故曰引

來氏知德曰不言吉凶者五已有危厲之戒也



渙

句亨

王假有廟

句

利涉大川

句

利貞

傳渙亨剛來而不窮柔得位乎外而上同王假有廟王乃在中也利涉大川乘木有功也大象風行水上渙先王以享于帝立廟說卦剡木為舟剡木為楫舟楫之利以濟不通致遠以利天下蓋取諸渙序卦說而後散之故受之以渙渙者離也雜卦渙離也

三陽三陰陽上陰下散而不居坎陷而巽入水流而風行故名渙其定體則節之覆推也坎來居內則剛來居二仍得其中兌往居外則柔位乎四上同乎五此其所以亨也節苦而渙亨亦其對也王假有廟九五剛中以聚渙也萃之王假有廟九五剛中能致萃也巽木坎水以水乘木舟楫之象故為涉川而二五剛中巽行坎上故利惟九五剛正乃克有濟也故又利貞



初六

句

用拯

句

馬壯吉

拯子夏
傳作拊

傳初六之吉順也

當渙之初勢猶未敗則猶可及止也然稍緩則不及故必馬壯乃吉用渙初之用也拯救也馬壯九二也坎為亟心之馬而九二得中初六相承相比陰陽相濟于以收將散之人心資涉川之大利成假廟之膚功不難也傳所謂順言其勢也

來氏知德曰初六當渙之初未至離披之甚猶易于
拯者也但初六陰柔才不足以濟之幸九二剛中有
能濟之具者初能順之托以濟難而得壯馬也○又
曰陳平交歡太尉而易呂為劉仁傑潛授五龍而反
周為唐皆拯急難而得馬壯者也



九二 句 渙 句 奔其机 句 悔亡

傳渙奔其机得願也

机几也周禮五几通作机左傳設机而不倚是机即几也易舊註机依據之物宋禮部韻引此爻辭註云承物者是也二則已渙矣然坎自節之外而來此爻正象所謂剛來而不窮者是九來居二坎為勞卦得其所安而初六比近相承有几象焉故曰奔其机奔則疑有悔矣而得其几則勞而得逸危而得安也故悔亡傳曰得願謂剛而得中也

郭氏雍曰九二之剛自外來而得中得去危就安之

義故有奔机之象惟得中就安彖傳所以言不窮也



六三

句 渙其躬 句 无悔

傳渙其躬志在外也

渙至于三則已及其身矣而有應于上以陰從陽義也藉以濟渙宜也忘其身以從上亦不至于自失也陰柔處危有志于時得陽剛為之應則心之所向專一不知有其身矣陰柔悔也應剛故无悔



六四

句

渙其羣

句

元吉

句

渙有丘

句

匪夷所思

丘姚作近誤夷

荀作弟誤

傳渙其羣元吉光大也

此文即象所謂柔得位而上同者以柔下剛正位也
近承九五上同也虛而守正一心奉君其本立矣九
五而外旁無比應人臣義無私交公也忠也本然之
善也天下之渙皆起于人自為羣渙其羣則無所為

渙矣正本清源莫大乎是以視初之拯馬壯二之奔其机三之渙其躬者徑庭也故元吉夫渙而聚之人所知也至即渙以為聚人所不知也孔安國書序曰丘聚也渙有丘則是渙之中即有聚之道焉莫之致而致不期然而然公忠之感善類將盈庭矣豈平常思慮之所及哉言其用之神也

胡氏瑗曰天下之渙起于衆心乖離人自為羣六四上承九五當濟渙之任而居陰得正下無私應是大

臣秉大公之道使天下之羣盡散則天下之心不至
于乖散而無得以萃聚故得盡善元大之吉也

先儒謂此能散小羣以成大羣按此有語病凡羣皆
私也黨也無小大之分故渙羣乃所以為聚



九五

句

渙汗

句

其大號

句

渙

句

王居无咎

傳王居无咎正位也

此象所謂王假有廟利涉大川利貞者也去患如去

疾然有寒疾者必汗之有深患者必渙之此其渙之
當如汗之也非大聲疾呼曷克有濟其大號則如汗
之渙矣巽為風有呼號之象故曰大號凡此皆王之
為也九五陽剛中正能正其位足以發號施令取羣
邪而渙之乃合九有而奉一尊矣此王之居為无咎
也以承先言則曰王假有廟以御衆言則曰王居无
咎至出納王命者則六四也故曰柔得位而上同



上九

句

渙其血

句

去

句

逖出

句

无咎

傳渙其血遠害也

汗則汗之而已血則針灸也亦去疾之事語曰去疾
莫如盡渙血則疾之根可拔也言其象也又變坎為
血卦故有此象可舍而去之逖遠也出如出亡之出
謂去之外境言遠去也此言其事當渙之極位處卦
外有陽剛變柔之實見人心之離已極而豫遠之禍
不及也故无咎此言其占

小畜六四血去惕出謂憂恤去而惕傷可出四字為句此渙其血與渙汗對三字為句各不相蒙本義謂遯當作惕與小畜六四同者誤至云渙其血則去渙其遯則出文義亦未安

朱氏震曰遯遠也去遯出一本作惕出然象曰遯害當從遯矣

錢氏一本曰去不復來遯不復近出不復入其于坎血遠而又遠何咎之有



節

亨 句

苦節不可貞

傳節亨剛柔分而剛得中苦節不可貞其道窮也說以行險當位以節中正以通天地節而四時成節以制度不傷財不害民大象澤上有水節君子以制數度議德行序卦物不可以終離故受之以節雜卦節止也

此與渙覆推渙巽上坎下故柔得位而上同此坎上兌下坎剛兌柔故剛柔分而剛得中得中謂坎之剛

得九五也毛西河引盧氏之說曰此本泰卦分乾九
三上升坤五分坤六五下處乾三是剛柔分而剛得
中不知雜卦反覆相推之法更不假此而前後渾合
也澤上有水恐其過也故節之卦之取名言當節也
唯剛得中故能節能節故亨傳說以行險之下皆節
之所以亨也節以制度皆法天地四時以為節節即
禮也其在性則發而皆中節也禮以嘉天下之會節
之大者故亨此可貞之常道也若過其節則苦矣禮

盛則離豈常道哉故傳曰其道窮言非節之本然也
程傳不可固守以為常本義不可守以為貞俱未協
觀初九之不出戶庭九二之不出門庭一為无咎一
為凶此可知節之為道非拘苦執一之謂矣豈獨上
九為貞之窮哉



初九句不出戶庭句无咎

傳不出戶庭知通塞也繫辭不出戶庭无咎子曰亂之

所生也則言語以為階君不密則失臣臣不密則失身
機事不密則害成是以君子慎密而不出也

止水之流為澤坎塞其下為兌故初九為節之基當
節之初時不可出知此而安貧守道無與于世默足
以容道固然也初無所苦何咎之有戶庭戶內之庭
不出內藏也密也

王氏申子曰陽剛在下居得其正當節之初知其時
未可行故謹言慎行至于不出戶外之庭是知節而

能止者故无咎



九二 句 不出門庭 句 凶

傳不出門庭凶失時極也

門庭門外之庭出而見人之所二已非遺人離世之地而仍不出焉過矣陽剛固守不與五應失時之宜即失節之道與節亨者異矣故凶

錢氏立志曰澤所以鍾水也水始至則增其防以瀦

之初九是也水漸盛則啓其實以洩之九二是也二與初同道則失其節矣



六三 句 不節若 句 則嗟若 句 无咎

傳不節之嗟又誰咎也

節也者中也正也六三偏暗處危即不節也不節而自昧之終無補過之日矣如其嗟若則由侈泰而敦禮數自悔深切修己誠至人終不得而咎之傳曰不

節之嗟是自嗟其不節也自知之明猶在也如初之知通塞二之失時極皆明不明之辨故嗟若者有補過之道焉

李氏彥章曰臨之六三失臨之道而既憂之節之六三失節之道而嗟若皆得无咎易以補過為善者也

三

六四 句 安節 句 亨

傳安節之亨承上道也

澤為鍾水之區節也六四承九五之中滿而流通之下歸于澤是安節之象也以其位言之則六居乎四上承九五秉禮奉法所謂安汝止者也上下相與其志大行故亨



九五

句

甘節

句

吉

句

往有尚

傳甘節之吉居位中也

坎為水水有源而流通者必甘故美泉曰甘泉無源

而涸竭者苦故死水曰苦水是故甘也者美在中也
中也者禮也中節也和也九五居中得正為節之主
有常不溢斯其所以為甘乎順天地而協四時其吉
可知行而中節即嘉會之合故有尚尚嘉也彖所謂
當位以節中正以通者也

朱子語類曰甘便對那苦甘節與禮之用和為貴相
似



上六句 苦節貞 句 凶 句 悔亡

傳苦節貞凶其道窮也

居節之極窮無所之苦矣苦節不可貞而貞焉得無
凶乎以之處已則固以之處世則逆悖天則而夫人
情凶之道也即所謂不可貞也傳曰道窮猶言行不
去也悔亡言無不節之悔而已尚不能无咎也故傳
止釋貞凶先儒以寧儉寧固釋悔亡亦未得節字之
義文理亦費周折

苦節不可貞故凶至不節之悔則亡之



中孚

句

豚魚吉

句

利涉大川

句

利貞

傳中孚柔在內而剛得中說而巽孚乃化邦也豚魚吉信及豚魚也利涉大川乘木舟虛也中孚以利貞乃應乎天也大象澤上有風中孚君子以議獄緩死序卦節而信之故受之以中孚雜卦中孚信也


中孚與小過對待相推六三六四兩柔在內九二九

五兩剛得中柔內則虛而無一私之間剛中則實而有至誠之契此中孚之所以名也卵化為孚生生之真也豚魚江豚也天將風則出拜至信不爽生大澤之中卦體上風下澤故象及之信如豚魚無所作為出于本然則孚之至矣孚則無有不感者故吉至信自可以涉險而澤上乘木中虛有舟象焉故利涉也然孚之所以吉者惟其中也即正也九二九五鶴鳴子和有孚攣如何所不利苟其不貞重然諾矜期許

男女相私盜賊相救孚亦何取焉

豚魚先儒皆分二物取象坎巽惟來氏知德以為江豚取義風澤更覺切合從之

蘇氏軾曰中孚信也而謂之中孚者如羽蟲之孚有諸中而後能化也內無陽不生故能剛得中然後為中孚也語亦親切



初九 句 虞 句 吉 句 有他 句 不燕

傳初九虞吉志未變也

虞娛通易虞與憂對言安樂也又魏相傳云君安虞而民和睦娛義也非虞度之謂故傳曰志未變初九當孚之始守已自安則吉然有應于四懼其貳也貳則不安矣故曰有他不燕他謂四也不慮四之必貳者孚初不變之義為重

荀氏爽曰虞安也初應于四宜自安虞無意于四則吉故曰虞吉也有意于四則不安故曰有他不燕也



九二

句 鳴鶴在陰

句

其子和之

句 我有好爵

句

吾與爾

靡之

靡 卑官作廉陸績
作 麻京房作劇

傳其子和之中心願也繫辭鳴鶴在陰其子和之我有

好爵吾與爾靡之子曰君子居其室出其言善則千里

之外應之況其邇者乎居其室出其言不善則千里之

外違之況其邇者乎言出乎身加乎民行發乎邇見乎

遠言行君子之樞機樞機之發榮辱之主也言行君子

之所以動天地也可不慎乎

鶴當秋而鳴兌正秋也又為口故取象鶴鳴九陽也而居下卦之中故曰在陰其子謂巽也巽兌之反禽類而九五同德六四含虛彼此相對故和豕曰柔在內而剛得中爻傳曰中心願正謂二五之合也二五實而含三四之虛非和鳴之致乎陰美而利好爵也上下共之靡縻通繫而不解共天位食天祿彼此相維爾我無間五非二誰與共此乎故曰我有爾靡此

曰縻五曰攣其理正同

言行應違皆由中出繫辭之義一也兌口出言弇風
申命亦有象焉

二五

六三句得敵句或鼓或罷句或泣或歌

傳或鼓或罷位不當也

孚者惟中而六三處偏危之地將從二乎則已過之
將從五乎則又不及有應者上九耳本爻不中不正

上九亦然故曰敵陰陽協應故曰得有應于上則中
益不孚何者情相牽也又當中孚之界上下卦交接
之地情牽于外若將鼓矣而失其所孚則又或罷失
所孚則或泣矣而不正之投則又或歌此中孚之所
以不貴應也既無初九虞安之吉而有他不燕則此
爻專之

來氏知德曰六三陰柔不正而上九應之此為悅之
極彼為信之窮皆相敵矣是以或鼓或罷而作止不

定或泣或歌而哀樂無常其象如此占者不能孚信可知矣



六四

句

月幾望

句

馬匹亡无咎

幾京房作近
荀爽作既

傳馬匹亡絕類上也

陰受陽光四與五近如月之將望五孚之主萬邦作孚不可以二而六四比三稍有繫累咎必隨之然以陰從陽地位親切三雖同類不相及也坤牝馬故柔

爻亦稱馬同類故稱匹亡舍之而從五也如是則孚者專矣故无咎初九有他不燕六四馬匹亡无咎知孚之貴專也



九五 句 有孚攣如 句 无咎


傳有孚攣如位正當也

九五孚之主也剛健中正與九二同德相與中含二陰臣民之際渾然天合綢繆固結上下一致有若攣

然乎之至也象所謂孚乃化邦者也貞以應天者也
然僅曰无咎云者人君以天下之心為心一有不孚
則睽且否矣咎可勝言哉緝熙敬止烈假不瑕不聞
亦式不諫亦入斯所謂无咎非盛德未易臻此也二
曰靡五曰攣卦情可想見矣

來氏知德曰攣如即鶴鳴子和我爵爾靡也靡與攣
字皆有固結而不可解之意靡者繫戀也攣者相連
也如與九二合成一體包二陰以成中孚故有此象

无咎者上下交而德業成也



上九

句

翰音登于天

句

貞凶

傳翰音登于天何可長也

高亢不中孚之窮而失實者也以九五之盛德而矯
而出之以為不足信以九二之忠摯則疎而遠之以
為不足與所應者惟有六三而不中不正未足以為
孚也張其文貌純盜虛聲務外不情不為鶴之鳴而

為飛鳥之遺音不在陰而于天其勢不可久居終窮之道也故凶彖曰利貞而此曰貞凶者彼九五應乎天而此之登于天者出乎天位之外也

胡氏瑗曰翰者鳥羽之高飛也上九在一卦之上居窮極之地是無純誠之心篤實之道徒務其虛聲外飾以矯偽為尚如鳥之飛登于天徒聞其虛聲而已蘇氏軾曰翰者飛且鳴者也處外而居上非中孚之道飛而求顯鳴而求信者也故曰翰音登于天九二

在陰而子和上九飛鳴而登天其道蓋相反也

來氏知德曰禮記雞曰翰音而此亦曰翰音者以巽
為雞也因錯小過飛鳥遺之音故九二曰鶴鳴而此
曰翰音也雞信物天將明則鳴有中孚之意巽為高
天之象又居天位亦登天之象也登升也言雞之聲
登聞于天也九二上孚于五在陰而子和上九不下
孚于三翰音反登天其道蓋相反矣中孚與小過相
為對待孚盡則為小過矣翰音登于天借小過象辭

飛鳥遺之音為辭良有以也本義及來氏皆據禮文以翰音為雞蓋取其信也豚魚也鶴也雞也皆信物故有所取爾也雞不于埒而于天必無之事斯所謂信窮而妄者歟



小過 句 亨利貞 句 可小事 句 不可大事 句 飛鳥遺之音

句 不宜上 句 宜下 句 大吉

傳小過小者過而亨也過以利貞與時行也柔得中是

以小事吉也剛失位而不中是以不可大事也有飛鳥之象馬飛鳥遺之音不宜上宜下大吉上逆而下順也大象山上有雷小過君子以行過乎恭喪過乎哀用過乎儉繫辭斷木為杵掘地為臼臼杵之利萬民以濟蓋取諸小過序卦有其信者必行之故受之以小過雜卦小過過也

中孚之對待也二陽四陰陽大陰小陰多于陽故曰小過剛柔偏勝皆過也然過柔尚可以自處故有亨

通之道而其亨亦必柔正不然則與懦不可為矣故
利貞二五之中即正也以處小事何所不利三四偏
邪剛不如柔矣故不可大事陽內連而陰分列若鳥
羽然故有飛鳥之象兩羽方張其過迅疾故僅有遺
音二五皆中而二為尤正故宜下不宜上上謂五下
謂二是何也六五之詞曰已上也大吉得適中之道
又不僅小事之吉已也大事關乎天下國家小事曰
用常行

王氏弼曰飛鳥遺其音聲哀以求處上愈無所適下則得所安愈上則愈窮莫若飛鳥也按此上下之義亦活



初六 句飛鳥以凶

傳飛鳥以凶不可如何也

小過之初尚未過也下也彖曰宜下則當吉矣然過之幾浸浸乎動又有應于四不安于下以陰居初不

安于小偏妄之萌往而不返雖欲止之烏乎止之六
爻惟初與上擬以飛鳥與豕同象蓋四陰排列如鳥
之翼初上如羽之張故直象之曰飛鳥也以凶云者
謂自取也

孔氏穎達曰小過之義上逆下順而初應在上卦進
而之逆同于飛鳥之無所措足故曰飛鳥以凶

項氏安世曰初六在艮之下當止而反飛以飛致凶
上六居震之極其飛已高則麗于網罟

龔氏煥曰大過卦辭以棟為象而初上兩爻亦以鳥
言大過陽過于中而三四又陽之中也小過陰過于
外初上又陰之外也



六二 句過其祖 句過其妣 句不及其君 句過其臣 句无
咎

傳不及其君臣不可過也

妣祖姑也孫婦祔于祖姑禮也六二柔中越兩陽而

與六五相應若孫婦之祔祖姑彼此同德故相遇也
陽陰之君也越兩陽而同五疑若過之然陽不相應
而二有中德非相抗也故曰不及五雖尊位然陰坤
也臣道也彼此同心而未嘗失君臣之大分故曰遇
其臣要之六二中正得陰之純雖處過之時而自守
以道故不過也彖所謂貞也下也吉之道也无咎則
小過之大吉也

周易觀彖曰此爻與五兩陰相應有妯婦之配無君

臣之交故其越四應五是過祖而遇妣也無正應于
上而居下位是不及君而自得其臣也竊按小過中
孚陰陽之大分本卦以陰之過乎陽故曰小過也陽
大陰小陽君陰臣同一二五之應不得謂臣妣有異
遇也傳曰臣不可過正謂不及其君與過其祖之文
稍異耳不與陽應故不及也六五則未嘗不同德相
遇也



九三

句

弗過

句

防之

句

從

句

或戕之

句

凶

傳從或戕之凶如何也

本卦陽少陰多是陽不能過乎陰也三四陽爻故皆
曰弗過陽不能過乎陰則陰欲害陽者也本文雖有
應于上正所當防而九三偏危之地未免少智是不
能防人者不防則甚且以陰為美矣得無溺而從之
乎從之則上且挾其已過之勢因戕之矣戕害也覆
敗死喪皆不防之致凶何可言

來氏知德曰弗過者陽不能過乎陰也兩字絕句本卦陰過乎陽故二陽皆稱弗過防之者當備懼防乎其陰也



九四句无咎句弗過句遇之句往厲必戒句勿用永貞句
傳弗過遇之位不當也往厲必戒終不可長也

九四承五以剛自勝可无咎也陽少于陰亦弗過矣然不中不正近承六五不能不相遇也所處之位則

然也其遇之而往也有危道焉陰盛而五為之主四又多懼故也不可不戒所戒者永長而固守也小過之時為之也彖之利貞為六二言爻之勿用永貞為九四言也



六五句密雲不雨句自我西郊句公弋句取彼在穴
傳密雲不雨已上也

陰陽和而後雨澤降小畜陰畜陽一陰主之小過陰

勝陽六五主之故本卦爻辭與小畜象辭同一不雨
自西之象陰盛為雲雲升則不雨震動而艮止亦不
雨也震變兌為澤又西方也六五陰過乎陽而居尊
其事已大其勢已上六二不相與也其將何所取哉
深求于上其類窮矣所取甚微非公狩所有事也已
上之勢難乎為尊此彖所謂不宜上也不可大事也
震張弓之象上六木杪巢穴之象又卦象飛鳥飛之
窮者則在穴之象先儒謂下應六二為取穴之義未

知小過之時六五已上與下不交傳止釋密雲不雨
曰已上則知下文皆同義矣非謂上文不雨而下文
又別有所取也翼義顯然明盡惜乎味之者少也



上六 句 弗遇 句 過之 句 飛鳥離之 句 凶 句 是謂災青

傳弗遇過之已亢也

宜下不宜上上則窮矣當其在下猶相遇也上則陰
陽離絕竟不遇矣所謂小過者此則竟過之矣鳥飛

而不止至于離其羣而不復棲未有不入于網羅者
其凶可知彖曰飛鳥遺之音此且不聞其音矣以人
事言之所謂凶者外災內青不一端也復之上曰迷
復凶有災青此曰弗遇過之飛鳥離之凶是謂災青
彼陽復之窮此陰過之窮也



既濟亨

句小

利貞

句


初吉終亂

傳既濟亨小者亨也利貞剛柔正而位當也初吉柔得

中也終止則亂其道窮也大象水在火上既濟君子以思患而豫防之序卦有過物者必濟故受之以既濟雜卦既濟定也

既未濟兩卦對待相推六十四卦中泰否天地之合既未濟泰否之雜坎離之交水火之資天地之用故以終篇實時事往復之幾也天地之無終無始者也本卦水上火下其用交故曰既濟此如泰然然泰為天地之交既濟則水火之交故泰曰吉亨而此曰亨

又曰小也既濟言亨則已小矣然莫非亨也即思患豫防之義又既濟當用柔剛大柔小故曰亨又曰小也九五六二剛外柔內皆得正而當位是其利且貞也既濟之初猶未濟也內卦離體柔而得中虛已以上交審幾而度務此小者之所以亨也故吉既濟之終未嘗非小而窮陰在上偏暗不中不能永終以持其蔽亂矣上六曰濡首厲傳曰何可久此濟之所以難為終也



初九

句

曳其輪

句

濡其尾无咎

傳曳其輪義无咎也

卦之初多稱尾初剛離體不遽進者故有曳輪濡尾之象又坎為輿與下則輪也輪車之所恃以行者方既濟之始初九剛明是時方濟而不敢自恃者車之行恃乎輪曳輪則行者止矣濡尾有應于險能止險善補過也故无咎

周易觀象曰既濟之初可以濟而猶未可輕濟也初居下當濟時有濡尾之象然有剛正之德故能曳其輪而不進則雖濡其尾而无咎矣蓋欲進而即止臨事而懼者也故无咎

先儒因下小狐濡尾遂以本句亦取狐象上下文義兩端未貫傳曰曳其輪義无咎也上句是主甚為明顯惟周易觀象深得翼義



六二

句

婦喪其茀

句

勿逐

句

七日得

茀子夏傳作髴荀爽作紱董遇作弗

傳七日得以中道也

六二柔順至中當既濟之時而不苟于濟者彖所謂小者之亨初之所以吉也有慎儀守禮時不克違之象爻柔故稱婦婦行必有蔽茀蔽也喪其蔽則儀弗修禮不備勿逐不急索之也不行也有待也五本正應而三隅之四間之不能遽合也至七日則陽數一周而自復儀無弗修禮無弗備斯濟之至善者矣傳

曰得中道以二之德盛也非僅得其所喪之謂

弟虞仲翔曰謂鬢髮也王輔嗣亦曰首飾也子夏傳
亦作髯毛西河據此謂先儒不當解為車弟是不觀
二之為婦柔中得位貴也其為翟弟亦可知矣不必
以蒲藻為類也弟弟通



九三

句

高宗伐鬼方

句

三年克之

句

小人勿用

傳三年克之憊也

三當既濟之半是濟之將過者九三剛危之地又離
為兵戈故有克敵之象上承六四坎體陰爻本卦水
火之交離東坎西鬼方西戎也三年爻數也以三剛
伐六四之陰期在必克故至三年三年則師勞力竭
財用殫耗矣夫以國家之全勢必三年而後克之則
濟之難可見克伐至于鬼方濟之盛亦可見也然其
時已將過矣又承坎險小人之象而上六正應柔悅
藏奸不可不慎故戒勿用師之上六曰開國承家小

人勿用益事平之後當定規模非偏長制勝所能為
亦非懷安溺志者所能與也其以高宗當之者易之
時幾也殷道屢興至武丁之世中興之後不復再興
正既濟將過之時也象以此爻當之而又曰小人勿
用者殆與文王同一憂時之心乎西羌傳云殷室中
衰諸侯皆叛至高宗征西戎三年乃克是其事也



六四

句 繻 句

有衣袽

句

終日戒

繻釋文作襦子夏王廡
本作襦說文作需王弼

云濡當

作濡

傳終日戒有所疑也

濡之為濡王輔嗣說也蓋舟漏之謂初敗絮塞舟漏之物與帑同徐鍇云帑帛臭書盤庚篇云若乘舟汝勿濟臭厥載則初之足備舟漏自古有然矣六四既濟坎體故有漸濡之象而以柔居之不敢自恃其濟者故既有衣袽以補罅漏至終日戒嚴而不稍懈弛上有九五之君下有重剛之乘應是不安其所居者

也四本多懼此又甚焉故傳曰有所疑

古者削帛為縵關門符信也故舊說有以終日戒為
關防戒備者毛西河謂不當以漢制解周易良是然
漢制近古符信在身而衣敗絮不敢出以示人蓋亦
疑懼之時為之也存之以見本字之義

張氏清子曰六四出離入坎此濟道將革之時也濟
道將革則罅漏必生四坎體也故取漏舟為戒終日
戒者自朝至夕不忘戒備常若坐敝舟而水驟至焉

斯可以免覆溺之患



九五

句

東鄰殺牛

句

不如西鄰之禴祭

句

實受其福

禴漢

書作
淪

傳東鄰殺牛不如西鄰之時也實受其福吉大來也

九五既濟之君盛已極矣然六二為其正應是猶有
尚儉之意焉殺牛祭之豐者禴祭之薄者東西彼此
之辭言彼之豐不如此之儉蓋郊用太牢在冬而禴

祭在夏祭得其時宗廟用享故受福也此亦亨小之意離坎本東西之卦而離有牛象坎得中內實有致誠尚實之象致誠尚實時之大者故祭則受福

潘氏士藻曰五以陽剛中正當物久豐盛之時故借東鄰祭禮以示警懼夫祭時為大時苟得矣則明德馨而黍稷可薦明信昭而沼毛可羞是以東鄰殺牛不如西鄰之禴祭實受其福在于合時不在物豐也東西彼此之詞不以二五對言

姚氏舜牧曰人君當既濟時享治之盛驕奢易萌而誠敬必不足故聖人借兩鄰以為訓若曰東鄰殺牛何其盛也西鄰禴祭何其薄也然神無常享享于克誠彼殺牛者反不如禴祭者之實受其福信乎享神者在誠不在物保治者以實不以文此蓋教以祈天保命之道



上六

句

濡其首

厲

厲

傳濡其首厲何可久也

當既濟之終柔暗之甚而居坎險之極故有濡首之象厲危也傳曰何可久言濟極而衰也此象所謂終亂者也

薛氏溫其曰濡其尾者有後顧之義濡其首者不慮前也恃以為濟遂致陷沒沒而至首其尾可知歷險而不虞患故曰亂者有其治者也既濟終亂其義見矣

朱氏震曰以畫卦言之初為始為本上為終為末以成卦言之上為首為前初為尾為後



未濟

句亨

句

小狐汔濟

句

濡其尾无攸利

史記引本狐涉水濡其尾

傳未濟亨柔得中也小狐汔濟未出中也濡其尾无攸利不續終也雖不當位剛柔應也大象火在水上未濟君子以慎辨物居方序卦物不可窮也故受之以未濟終焉雜卦未濟男之窮也

與既濟覆推亦相對待水火不交故曰未濟否之似也然未濟有當濟之理離往居外則六居五而得中是能審度時勢而不失緩急之宜者濟之主也所以亨之才也坎來居內則九居二而未出中亦幾幾乎濟矣然險而難恃也故又有濡尾之戒言當慎始斯有終也

汔幾也幾幾乎濟也九二之才也而又言濡尾無利者懼其陷于險不終濟也坎之中也下二句本戒辭

而非九二之實象也傳曰小狐汔濟未出中也已了九二之事矣而于濡尾无利作一句解之曰不續終也是別有可慮之意故又合通體而結言之曰雖不當位剛柔應也則亨且濟之意居多矣先儒俱未全繹傳義

胡氏炳文曰天地不交為否否不曰亨否不通也水火不交為未濟非不濟也未焉爾故曰未濟亨



初六 句 濡其尾 句 吝

傳濡其尾亦不知極也

未濟之初柔邪偏暗又有九四為之應則喜于援上而不安其居故昧焉一往不知其所終極以此言濟羞不免矣濡尾猶言失始也濡尾即濡首之漸既濟之濡尾无咎而此則吝者才為之也時與變為之也既濟之初才甚剛正事方濟而能止未濟之初則才甚柔邪急于濟而犯險此其所以異也



九二

句

曳其輪

句

貞吉

傳九二貞吉中以行正也

九陽爻才剛與五相應似勇於濟者而二有中德則不敢輕濟矣故亦有曳輪之象貞吉者得中即所以為正也故傳曰中以行正也



六三

句

未濟征凶

句

利涉大川

傳未濟征凶位不當也

征凶不濟也利涉大川則又竟濟矣是何也爻當上下卦之間火水不交之地故直提卦名曰此未濟者也以柔居危巽懦觀望不離于險征行固凶然于斯時也未濟已半坎難將盡必勇于濟而後離者合也下出坎險上應陽剛則未濟者濟矣此又為三勉也

三〇三

九四

句貞

句

吉悔亡

句

震句

用伐鬼方三年

句

有賞于

大國

傳貞吉悔亡志行也

九四出險近君有志于濟而有濟之才當濟之任者
以剛濟柔正也吉之道也多懼之地雖若有悔而剛
以濟柔實亡悔也是剛豈非未濟求濟之要哉以高
宗之時觀之可見矣殷道中衰諸侯不朝人心離散
非大加振作其何能濟則所以震疊其聲靈者先伐
而後賞駿厲嚴肅之遺猶可睹也故用伐久叛之遠

國至于三年之久必克之而後已于是大國之効命者賞錫之典行焉一伐一賞所以為震者至矣此所謂貞吉而悔亡者也傳曰志行以濟為志即以志為貞也

來氏知德曰未濟與既濟相綜未濟九四即既濟九三故爻辭同亦如損益相綜損之六五即益之六二夬姤相綜夬之九四即姤之九三所以爻辭相同



六五

句

貞吉

句

无悔

句

君子之光

句

有孚吉

傳君子之光其暉吉也

柔而得中即所以為正亦无所為悔也六五位尊而離明故曰君子之光又虛中而應九二上下相資故有孚以爻之柔而得中言則貞而吉矣以爻之虛而有應言則有孚而吉也未濟而適能濟其善不勝言也

貞吉悔亡咸大壯及本卦之九四也皆以時義為貞

而亡其所悔至此爻連屬而言貞吉无悔則中德之盛為之又有異于他爻者矣



上九

句

有孚于飲酒

句

无咎

句

濡其首

句

有孚失是

傳飲酒濡首亦不知節也

未濟之極則將濟矣水火交而飲食衎衎所以需時也故无咎時乎時乎不可失也若溺于其中不復求濟則失之矣養其身以有為惟知節者能之

丘氏富國曰既言飲酒之无咎復言飲酒濡首之失何也蓋飲酒可也耽酒而至于濡首則昔之有孚者今夫于是矣

李氏簡曰未濟之終甫及既濟而復以濡首戒之懼終始其要无咎此之謂易之道也

易翼宗卷六